



BFAM

PORTUGUESE CREOLE


www.iBFAM.org

BO PADI CIU BO MULTIPLIKA



DISKUBRI KUSAS SUKUNDIDU NA BIBLIA

KUMSA VIVI UM VIDA KU TA PADI FRUTA, VIDA KU DEUS DISJA PA BO



UN LIBRU DI STUDU BIBLIKU PRATIKU

KU LISONS KU TA FALA DI KUSAS KU STA SUKUNDIDU NA BIBLIA

*“Jesus papia tudu es kusas na komparason pa manga di jintis; i ka ta falaba elis nada sin komparason, pa i pudi sedu suma ku profeta fala:” N na yabri ña boka na komparason; N na konta kusas sukundidu disna di tempu ku mundu kumpudu.
(Mateus 13: 34-35).*

BO PADI CIU BO MULTIPLIKA

UN LIBRU DI STUDU BIBLIKU PRATIKU

LIBRU DI BPCBM + GRUPUS IMPORTANTI



Publikadu pa:

Kada Kasa pa Kristu Internasional

Kaiša Postal 64000, Colorado Springs, CO 80962-4000 USA
719)-260-8888

BFAM@ehc.org

ww.iBFAM.org

Diritu di Autor © 2012 di Kada Kasa pa Kristu

Algin pudi kopia o distribui e libru si:

- I tene pirmison di autor - Kada Kasa pa Kristu Internasional.
- Kada Kasa pa Kristu dadu kunsimentu di nunde i kuma ku e libru na usadu.
- I ka na bindidu na un presu mas di ki kustu di kopia.

Traduson ku adaptason di lisons ta setadu si:

- Traduson kordenadu atraves di Kada Kasa pa Kristu Internasional.
- I ten un korkordansia di kuma Kada Kasa pa Kristu i uniku ke tene tudu diritu di autor di tudu traduson ku versions.
- Tudu adaptason ne libru i setadu pa Kada Kasa pa Kristu.
- Un kopia final dadu pa Kada Kasa pa Kristu, pa i pudi guardadu i distribuidu (i dibi di sedu un kopia mprimidu ku un utru kopia dižital.

Lisons di BPCBM i fasidu pa pudi trena sigiduris di Kristu pabia di kila, i dibi di ntindidu diritu pa pudi risibi bon nsinamentu na kada lison. Si bu ka risibi inda trenamentu di kuma ku bu pudi tarbaja ku BPCBM, kontakta Kada Kasa pa Kristu pa e dau un trenamentu di kuma ku bu pudi tarbaja ku e libru.

Kuasi tudu versikulus Bibliku e tiradu na verson bibliku di TODAY'S NEW INTERNATIONAL VERSION®, TNIV®. Copyright© atraves di Sosiedadi Internasionl di Biblia. Usadu ku pirmison di Publikadur di Biblia, Zondervan. Tudu diritu reservadu.

I distribuidu pa Kada Kasa Pa Kristu Internasional

INDISI DI BPCBM

LIBRU DI BPCBM

| | |
|---|-----------|
| Intruduson di BPCBM..... | Pazina 3 |
| Intruduson di Storias..... | Pazina 4 |
| Kunsi Storia..... | Pazina 5 |
| Ntindi Storia..... | Pazina 6 |
| Diskubri Bardadi..... | Pazina 7 |
| Uniku Karakteristika di BPCBM..... | Pazina 9 |
| Pasus ku Disinvovimentu di BPCBM BPCBM..... | Pazina 11 |
| Lisons di Pratika..... | Pazina 12 |
| Organisa Grupus di Disipulamentu..... | Pazina 15 |
| Grupi Di Lisons Importanti..... | Pazina 16 |
| Splikason Aserka di BPCBM..... | Pazina 17 |

GRUPU DI LISONS IMPORTANTI

| | |
|--|------------------|
| Grupi di Lison 1: PEDRA DI SKINA..... | Pazina 19 |
| <i>Relason Puru</i> | |
| Grupi di Lison 2: ALISERSU..... | Pazina 33 |
| <i>Fika na Kristu</i> | |
| Grupi di Lison 3: PAREDIS..... | Pazina 41 |
| <i>Vida Ku Ta Padi Fruta</i> | |
| Grupi di Lison 4: KANKRA..... | Pazina 49 |
| <i>Bardadis Important</i> | |

Intruduson di

BO PADI CIU BO MULTIPLIKA

Kursu di “Bo Padi Ciu Bo Multiplika” (BPCBM), i un libru disinvolidu ku ta usadu pa forma o pa disipula sigiduris di Kristu ku kilis ku misti sedu sigiduris di Kristu pa e pudi ntindi aserka di bon kumuñon ku e pudi tene ku Deus bibu di bardadi. BPCBM i un kursu ku distinadu pa mostra sigiduris di Kristu vida ku ta padi fruta ku e pudi tene na kumuñon ku Jesus.

Jinti kumpudu pa e tene bon kumuñon ku se kumpañer. Mas importanti inda, jinti kumpudu pa e vivi na kumuñon ku Deus. Ma pabia di pekadu no kumuñon ta kebra entri nos, tambi i ta kebra entri nos ku Deus. Pabia di kumuñon kebradu i leba jintis na vivi ku falta di ermondadi ku se kumpañer, ku restu di kriason, i ku falta di kumuñon ku Deus. I pabia di kila ku pui no tene gera, fomi, matansa, duensa, guvernantis ku sosiedadi kurumpidu. Nkuantu no ka ntindi manera di libra di pekadu i kuma di rekonsilia, no sta distinadu pa vivi un vida sin speransa.

Bon Noba i kuma Deus ranja un manera di kubri pekadu i manera di rekonsilia. BPCBM ta nsina jinti lei i diskubri es Bon Noba ku ta ojadu na palabra Santu di Deus ku sedu Biblia. Si jinti na lei aserka di Bon Noba ku sta na storias bibliku, e na diskubri bardadis importanti ku sta na Biblia. Es bardadis importanti ku sta na Biblia e ta nsina sigiduris di Kristu pa e vivi un vida di kumuñon mas profundu ku Deus. Metudu di BPCBM pa diskubri bardadis ku sta na Biblia, ta juda mostra jinti kuma ke pudi studa i e ntindi Biblia minjor.

Na Biblia, Deus fasi un purmesa pa kilis ku ta buska kungsi bardadi: “bo pidi, bo ta dadu; bo buska, bo ta oca; bo bati porta, i ta yabridu pa bos. Kil ku pidi, i ta risibi; kil ku buska, i ta oca; kil ku bati porta, i ta yabridu el” (Mateus 7:7-8). Kursu di BPCBM ta nsina jinti pidi, buska i bati. I ta nsina jinti lei Biblia i buska bardadi di Deus. Bardadi i kuma Deus ta fika tristi ku no pekadu, I misti pa no tene un kumuñon ku El. Pa kilis ku sedu fiel na buska bardadi di Deus ku kilis ku ta vivi bardadi ku sta na Biblia, e purmitidu rekonsilia utru bias ku Deus. Ora ku kumuñon di omis ku Deus sta bon, e ta vivi un vida ku ta padi fruta.

E kursu dadu nomi di “Bo Padi Ciu Bo Multiplika” pabia purmeru pasu pa vivi un vida di kumuñon ku Deus i pa seta kuma Deus ku kumpunu pa vivi un vida ku ta padi fruta. No comadu pa vivi un vida ku ta padi fruta na karni i spiritualmenti (jubi Kumsada 1: 27-28 ku Mateus 28: 18-19). Di mesmu manera ku no ta kuida di no fijus na karni tok e sedu maduru, anos tambi, suma sigiduris di Kristu, no dibi di kuida di kirsimentu di no fijus na fe. Isemplu: un algin o grupu di krentis maduru na fe, e dibi di nsina kil nobu krentis ku na kirsi na maturidadi spiritual, e dibi di nsina elis palabra di Deus, mostra elis, tambi e dibi di kuriži elis di akordu ku bardadi i otridadi di palabra di Deus. Objektivu final di BPCBM i pa disinvolti vidas maduru ku ta padi frutas, pabia vida ku ta padi frutas na lebanu pa un kirsimentu spiritual.

Intruduson di Storias

Kada lison di BPCBM ta konsentra na un storia bibliku diferenti. Jesus fala di Si storias ku komparasons, I nsina kuma ke ku storias ku komparason tene, e sedu “kusas sukundidu disna ku mundu kumpudu” (Mateus 13:34-35). Deus sukundi sigridus na storias bibliku. I misti pa no buska i no diskubri e sigridus.

Lisons di BPCBM juntu ku metudu di studu di BPCBM na judau diskubri e sigridus, i na dau manera fasil pa bu pudi pui e bardadis na pratika, na bu vida di dia-a-dia. Si bu pui na pratika e bardadis ku bu oja na Biblia, i na judau pa bu tene un kumuñon mas profundu ku Deus; i na fasiu tene un vida di manga di amor, alegria ku pas.

No ta dau komparason ku sta na Biblia, pa mostra kuma ku algin pudi tarbaja ku metudu di studu di BPCBM i kuma ki pudi nsina aserka di importansia di un storia bibliku. Dipus di bu lei intruduson di Storia Bibliku, i dipus di bu lei tamba historia Bibliku, i na judau diskubri bardadis puderosu ku sta sukundidu na storia atraves di un grupu di novi (9) purguntas. Ma antis di bu kumsa lei, gasta un tempu bu pidi Deus pa I judau diskubri bardadis sukundidu.

Intruduson di Storia Bibliku: Amigus di Jesus fiaba kuma Jesus tene un kumuñon garandi dimas ku Deus. Manga di bias e nota kuma Jesus ta baiba gasta tempu El son I na ora, I na pidi Deus. Tambi e pirsibi kuma, i pabia di kumuñon ku Jesus tene ku Deus ku manda I sedu algin mas jiru di ki kualker utru omi tamba i pabia di kila ku manda I tene puder pa fasi milagris. Un dia amigos di Jesus pidil pa I nsina elis ora. Pa ruspundi elis, Jesus tira palabras di un orason maitu simplis pa mostra elis kuma ku e pudi ora. Na fin di orason, Jesus da Si amigos e komparason.

Jesus fala elis mas: “Talves un di bos pudi bai pa kasa di un amigu me-noti, i falal: ‘Amigu, pistan tris pon, pabia ña amigu sta na bias, i ciga na ña kasa, N ka tene nada di pui si danti.’ Kil di dentru i pudi falal: ‘Ka bu nkomodan, pabia porta fica ja; N sta na kama ku ña fijus. N ka pudi lanta pa dau el.’ N na fala bos kuma, nin ki ka lanta pa dal suma i si amigu, ma suma el i sekenti, i na lanta, i na dal tudu ki misti. Asin N fala bos: Bo pidi, bo ta dadu; bo buska, bo ta oca; bo bati porta, i ta yabridu pa bos. Tudu kil ku pidi i ta risibi; kin ku buska i ta oca; kil ku bati porta, i ta yabridu el. Kal pape na bo metadi ku si fiju pidil (pon, i ta dal pedra? O si i pidil) pis, i ta dal kobra? O si i pidil ovu, i na dal lakaran? Si abos ku sedu mau bo sibi da bon kusas pa bo fijus, ku fadi bo Pape ku sta na seu i ten ku da Spiritu Santu pa kilis ku pidil.” (Lukas 11:5-13)

Gosi ku bu kaba lei e storia, no na nsinau atraves di tris pasus ku na judau ntindi diritu e storia bibliku. I ten 3 purguntas ku sta na kada un di es 3 pasus. Total di tudu i 9 purguntas. Purmeru pasu na judau pa bu KUNSI storia. Sugundu pasu na judau NTINDI storia. Terseru pasu na judau pa bu DISKUBRI bardadi sukundidu na storia. Bu pudi gasta algun tempu, i ta dipindi di tempu ku bu misti gasta, pa tarbaja na spiritu di orason ora ku bu na studa kada pasu.

PASU 1: KUNSI STORIA - PUNTA

Antis di bu diskubri sigridus ku sta na un storia Bibliku o komparason bu dibi di "KUNSI" storia purmeru. Tudu storia tene tris kualidadi parsidu. Sin es tris kualidadis, storia ka ta sta kompletu.

Es i kil tris kualidadis ki pirsis na un storia:

1. Ba kin ki personažens di storia?
2. Kal ki ason di personažens na storia?
3. Kal ki Disinvolvimentus di storia?

Si bu pudi diskubri personažens, se ason, ku disinvolvimentu di un storia, asin bu na KUNSI storia. Gosi no na diskubri personažens, ason, ku disinvolvimentu di storia ku no kaba di lei.

Toma kaneta o lapis bu fasi asin:

- Riska dus liña bas di kada personažen. Personažen i algin ku sta na storia. Dipus di bu diskubri ja un personažen, i ka bali pena bu kontinua pui dus liña bas di mesmu personažen kada bias ku bu ojal mas na storia.
- Riska un liña bas di kada ason o verbu. Un verbu ta mostra un ason o akontisimentu.
- Riska un liña kumpridu bas di kada disinvolvimentu mas importanti i spesial di storia.

Gosi buska i bu marka kada personažen, ason, ku disinvolvimentu importanti di storia Bibliku:

Jesus fala elis mas: "Talves un di bos pudi bai pa kasa di un amigu me-noti, i falal: 'Amigu, pistan tris pon, pabia ña amigu sta na bias, i ciga na ña kasa, N ka tene nada di pui si dianti.' Kil di dentru i pudi falal: 'Ka bu nkomodan, pabia porta fica ja; N sta na kama ku ña fijus. N ka pudi lanta pa dau el.' N na fala bos kuma, nin ki ka lanta pa dal suma i si amigu, ma suma el i sekenti, i na lanta, i dal tudu ki misti. Asin N fala bos: Bo pidi, bo ta dadu; bo buska, bo ta oca; bo bati porta, i ta yabridu pa bos. Tudu kil ku pidi i ta risibi; kin ku buska i ta oca; kil ku bati porta, i ta yabridu el. Kal pape na bo metadi ku si fiju pidil (pon, i ta dal pedra? O si i pidil) pis, i ta dal kobra? O si i pidil ovu, i na dal lakaran? Si abos ku sedu mau bo sibi da bon kusas pa bo fijus, ku fadi bo Pape ku sta na seu i ten ku da Spiritu Santu pa kilis ku pidil." (Lukas 11:5-13)

Jubi de si bu marka diritu tudu es 9 personažens di storia. Esis i personažens ku dibi di markadu na storia:

- Jesus
- Abo
- Bu purmeru amigu ku bu pidi pon
- Bu sugundu amigu ku na bai bias
- Mininus ku sta na kama
- Kualker algin ku pidi, buska i bati porta
- Bu fiju
- Pape ku sta na seu
- Spiritu Santu

Bu KUNSI ja storia, pabia bu diskubri personažens, se ason, ku disinvolvimentu di storia. Pera un bokadu bu jubi si bu na pudi konta e mesmu storia ku vos altu o na sintidu, ma sin jubi na storia. Logo bu na pirsibi kuma bu kungsi ja sintidu di storia mas o menus

PASU 2: NTINDI STORIA - BUSKA

Gosi ku bu KUNSI storia, buska NTINDI importansia o signifikadu di storia. Manera mas fasil di NTINDI signifikadu di un storia i pa konsentra mas na diferentis asons di kada personažen na storia. Nes parti ja, i ta sedu importanti pa “no pui no kabesa” na lugar di kada personažen pa no pudi ntindi diritu signifikadu di storia. Pa fasi es, no dibi di fasi mas un grupu di tris purguntas. Es i kil grupu di tris purguntas ku no dibi di fasi pa kada personažen.

4. Kal sintimentu ku kada personažen pudi tene?
5. Kal ki skolia di kada personažen?
6. Kal ki motivu ku sta tras di skolia di kada personažen?

Izemplu, si bu pui bu kabesa na lugar di sugundu personažen na storia; ku sedu “Abo.” Kal ku pudi sedu bu sintimentu si bu bai kau di bu amigu me-noti pa pidil pon? Bu na panta? Bu na sta ku medu? Kal sintimentu ku bu na tene?

Dipus di bu studa sintimentus di un personažen, gosi pensa na skolia ku personažen pudiba fasi. Komparal ku bu kabesa propi, ke ku bu na pifiri fasi inves di bai pa kasa di bu amigu me-noti pa pidil pon? Bu na peraba te parmaña pa pidil pon? Bu na falaba bu amigu ku sta na bias kuma bu ka tene kusa di kume pa dal? Anos tudu no tene manga di skolia na diferenti mumentus di vida. I bon pa no jubi sempri kal skolia ku no dibi di fasi; no komparal ku skolia ku fasidu na storia.

Dipus di bu studa diferenti skolia di kada personažen bu dibi di buska ntindi motivus ku sta tras di skolia di kada personažen. Mas un bias, pui bu kabesa na lugar di es personažen, si bu sintiba medu (sintimentu) pa ciga kasa di bu amigu me-noti, mesmu asin bu tira kil medu fora, bu bati na porta di bu amigu. Ke ku es pudiba signifika? Ke ku pudiba sedu motivu garandi dimas ku pou pa bu fasi e skolia di tira kil medu fora, bu bai bati na porta di bu amigu? I na seduba pabia di amor ku bu tene pa bu amigu? O i na seduba pabia di obrigason pa da bu amigu kusa di kume? Ke ku na seduba motivu di bu skolia?

Si bu fasi purguntas aserka di sintimentu, skolia ku motivu, e purguntas ta judau pa bu KUNSI storia diritu. I ta judau pa bu tene manera di NTINDI balur di storia. Es tris purguntas dibi di fasidu pa kada personažen na storia. Izemplu, ke ku pudi sedu sintimentu di bu amigu si bu batil porta me-noti pa pidil pon? Bu amigu na fasi skolia pa dau pon o nau? Asin, pensa na motivu ku pudi pui bu amigu pa i dau pon ku bu pidil.

Si bu pui bu kabesa na lugar di kada personažen i bu fasi es tris purguntas aserka di sintimentus, skolias ku motivus, bu na nota kuma storia na torna real. Manga di bias ora ku no obi un storia, no ta pensa janan na sintimentus, skolias ku motivus di personažens sin ntindil diritu. Signifikadu real di un storia i ta mostradu na es tris purguntas. I pabia des tris purguntas ku no ta buska NTINDI bardadi na storia.

PASU 3: DISKUBRI BARDADI - BATI

Gosi ja ku bu studa pasus 1 ku 2 ku sedu: KUNSI i NTINDI storia, gosi no sta na terseru pasu ku sedu DISKUBRI bardadi sukundidu na storia. Lembra kuma di akordu ku es komparason Jesus fala, "si bu PIDI bu ta risibi, si bu BUSKA bu ta oca, si bu BATI porta i ta yabridu." Na Pasu 1 no fasiba tris purguntas ku judanu kungsi storia. Na Pasu 2 no staba na BUSKA kungsi kada personažen. Gosi na Pasu 3 no misti BATI na porta di Deus i no peral pa I yabri porta pa I mostra sigridus sukundidu ku sta na storia.

Jesus nsinanu kuma tudu mandamentus ku sta na Skritura pudi ruzumidu na dus mandamentus. Purmeru mandamentu i pa ama Deus ku tudu no korson, ku tudu no alma, ku tudu no ntindimentu i ku tudu no forsa. Sugundu mandamentu i pa ama no kunpañer suma nos propi. Es signifika kuma tudu storia na Biblia tene un lison riku pa nsinanu pensamentus ku asons bibliku, ku ta judanu pa no ntindi kuma ku no pudi ama Deus minjor, ku tudu no korson, ku tudu no alma, ku tudu no ntindimentu i ku tudu no forsa, i kuma ku no pudi ama no kunpañer suma nos propi.

Terseru pasu tene utru 3 purguntas ku na juda diskubri sigridus na Storia Bibliku. E purguntas e sedu muitu simplis, ma tambi, e sedu purguntas profundu:

7. Kal ki pensamentus ku asons bibliku ku sta na storia?
8. Ke ku e storia ta nsinan aserka di karater di Deus ku na judan pa N amal minjor?
9. Ke ku e storia ta nsinan aserka di ama ña kunpañer minjor?

Purgunta di Diskuberta 1:

Suma bu studa storia, kal ki pensamentu ku asons bibliku? I bardadi kuma Deus misti pa no pidi, no buska, no bati? Esis e sedu asons bibliku sertu? Ke mas ku bu oja na storia ku ta nsin角度 aserka di pensamentus ku asons sertu? Gasta un tempu pikininu pa bu fasi un lista:

Purgunta di Diskuberta 2:

Gosi ku bu konta ja kal ku sedu pensamentus ku asons bibliku, sugundu purgunta fala, "Ke ku e storia ta nsinan aserka di karater di Deus ku na judan pa N amal minjor?" Suma ku bu studa storia, i pudi sedu koretu pa fala kuma e storia na nsinanu kuma no pudi jubi Deus suma un bon pape? Ke mas ku e storia ta nsinanu aserka di Deus ku pudi judanu pa no amal ku tudu no korson, no alma, no pensamentu ku no forsa?

Purgunta di Diskuberta 3:

Ultimu purgunta fala, "Ke ku e storia ta nsinan pa N ama ña kunpañer minjor?" Suma bu studa storia, ke ku bu aprendi aserka di bo propi? Ke ku bu aprendi tambi aserka di kuma ku bu dibi di trata bu kunpañer Jesus fala pa ama no kunpañer suma no kabesa.

Ruzumu: Si bu fasi es 9 Purguntas na kualker storia Bibliku e na judau pa bu KUNSI i pa bu PIRSIBI storia, tambi e na judau DISKUBRI sigridus sukundidu dentru di storia. Es i lista di ruzumu di 9 Purguntas:

KUNSI STORIA

1. Personažens
2. Asons
3. Disinvovimentus

NTINDI STORIA

4. Sintimentus
5. Skolias
6. Motivus

DISKUBRI BARDADI

7. Asons ku pensamentus sertu
8. Ama Deus
9. Ama Bu KUNPAÑER

Uniku Karakteristika di

BO PADI CIU BO MULTIPLIKA

Suma ku bu na studa lisons di BPCBM, bu na oja kuma i ten uniku karakteristika nes libru ku ka ta ojadu na studu Bibliku. Es kuaru karakteristikas ta mostra ke ku diferensa BPCBM ku utrus studus Bibliku i ke ku fasi BPCBM pa i sedu bon.

1 - BPCBM I UN LIBRU KU STA BASIADU NA STORIA BIBLIKU.

Tudu lison di BPCBM basia na storia bibliku. Lisons ka fasidu pa nsina kusas fora di Skritura, ma e sedu storias ku komparasons ku ta ojadu na Biblia. Oca Jesus bin pa tera i moraba juntu ku omis. El i nsina Si sigiduris atraves di storias ku komparasons. Na bardadi, libru di Mateus ta mostra splikason di Jesus pabia di ke ki ta papiaba ku jintis na komparasons:

“Jesus papia tudu e kusas na komparason pa manga di jinti; i ka ta falaba elis nada sin komparason, pa i pudi sedu suma ku anunsiatur fala: ` N na yabri ña boka na komparason, N na konta kusas sukundidu disna di tempu ku mundu kumpudu.” (Mateus 13:34-35)

Ne versikulus, Jesus na mostraba pabia ku Deus kuji pa papia ku nos atraves di storias ku komparasons. Jesus na nsinaba elis kuma Deus sukundi Si pensamentus ku Si sigridus na storias ku komparasons.

Si bu studa Biblia, bu na oja kuma pertu di 70% di Biblia i basiadu na storias ku komparasons. Es ta mostra klaru kuma Deus pui manga di signifikadu ku puder na storias ku komparasons. Di un manera ben pensadu, autoris di BPCBM mistiba pa lisons basia ciu na storias ku komparasons pa libru pudi tene mas otridadi di Skritura. Na kada lison di BPCBM, bu na oja kuma i ten puku palabras ku ka sai direktamenti di Biblia.

Tambi e libru basia na storias bibliku pabia storias bibliku mas fasil lembra i konta utru bias. Si bu na sforsa pa diskubri sigridus sukundidu na Biblia, bu na lembra des diskubertas spesial pabia di sforsu ku bu fasi pa diskubri elis. Utru kusa i kuma, si bu kumsa fasi diskuberta bibliku, bu na apreñdi ciu pa bo propi i bu na sta mas pruntu pa pudi konta bu kunpañer aserka del tambi.

2 - METUDU DI BPCBM I BASIADU NA PIRMISON.

Si bu studa metudu di BPCBM bu na oja kuma e metudu ta nsina kuma ku abo propi bu pudi fasi purguntas koretu pa bu pudi diskubri sigridus sukundidu di Deus. Atraves de metudu sistematiku bu na nsinadu kuma ku bu pudi diskubri i risibi bardadi ku revelason di Deus atraves di Spiritu Santu. No na pidu pa bu dividi bu diskubertas - Bon Noba di Palabra di Deus - ku bu kunpañer. Metudu di BPCBM ta piritiu tene:

- Pirmison pa pensa na bo propi
- Pirmison pa fasi purguntas
- Pirmison pa ntindi
- Pirmison pa sukuta Spiritu Santu
- Pirmison pa konta utrus

3 - METUDU DI BPCBM I BASIADU NA DISKUBERTA.

No oja na Biblia kuma Deus misti pa jintis buska i pa e oja bardadi. Deus sukundi sigridus na Si palabra pa no pudi buska i pa no oja elis. Manga di bias i pabia di prosesu di diskuberta ku bardadis ta tene grandi signifika i mudansa na no vida. Li bas i sta un ditu simplis ku ta mostra balur di diskuberta:

- Si bu KONTAN, na DISKISI
- Si bu MOSTRAN, na LEMBRA
- Si bu pun pa nfasi, na PIRSIBI

Pa diskubri sigridus i un prosesu ku pirsis manga di nvolvimentu. No dibi di nvolvi no kabesa ciu na prosesu di diskuberta pa no pudi oja bardadi. Un di minjor manera pa pudi diskubri sigridus di Deus i pa nvolvi na grupu. Bu pudi studa storias abo son bu diskubri sigridus; ma bu pudi tamba studa storias ku un grupu pikininu di jinti; asin, bu na apre di manga di diskubertas atraves di utru jinti na grupu.

4 - METUDU DI BPCBM I BASIADU NA OBDIENSIA.

I ka ten purbitu si no diskubri sigridus di Deus ku sta na Skritura ma no ka pratikal na no vida. E pasažen ta kontanu kuma no na risibi benson di Deus si no pratika Si palabra ku Si bardadi na no vida:

“Ka bo sedu son obiduris di palabra. Si i asin, bo na ngana bo kabesa. Bo sedu fasiduris di kil ku palabra fala. Si algin i son obidur di palabra, i ka ta fasi konformi i fala, i suma un omi ku na jubi na spiju si rostu ki padidu ku el. I jubi si kurpu diritu, ma logu i da kosta, i diskisi kuma ki parsu. Ma kil ku jubi diritu pa lei pifitu ku ta liberta, i pega nel, i ka sedu son obidur ku ta diskisi, ma fasidur di kil ku palabra fala, si dunu ta sedu sortiadu na kil ki ta fasi.” (Tiagu 1:22-25)

Disinvovimentu di BPCBM ka ta basia so na Diskuberta ma i tene tamba Disinvovimentu di Aplikason pesual. Si no diskubri bardadi di Deus no dibi di buska ntindi kuma ku no pudi vivi kil bardadi. Jubi ke ku 2 Timótiu fala aserka di Skritura:

“Tudu Skritura i Deus ku nspirali; i ten purbitu pa nsina, pa raprindi, pa kuriži, pa mostra manera di yanda diritu, pa omi di Deus pudi sta kompletu, trenadu diritu pa tudu bon tarbaju.” (2 Timótiu 3:16-17)

Nota kuma e versikulu fala tudu Skritura “i bon.” Es misti mostra kuma si bardadis ku sta na Skritura pudu na pratika i na sedu bon pa nsina, raprindi, kuriži i pa trena. Ma e versikulus ka fala kuma Skritura na nsina, raprendi, kuriži i trena automatikamenti. Ma no dibi di piriti Skritura pa i nsinanu, raprindinu, kurižinu, pa i trenanu. Na Prosesu di Diskuberta di BPCBM, purmeru no ta diskubri bardadi ku Skritura nsinanu. Dipus di no diskubri e bardadis, no ta piriti Skritura pa i raprindinu, kurižinu, pa i trenanu. Li bas, i sta un lista di purguntas ku no pudi fasi pa piriti Skritura pa i raprindinu, kurižinu, pa i trenanu.

- RAPRINDI: I ta fala di bu Pasadu
Kuma ku ña pensamentus aserka di Deus ku ña asons ta komparadu ku pensamentus ku asons bibliku ku N apre di na storia?
- KURIŽI: I ta fala di bu Presenti
Ke ku N pudi fasi pa kuriži ña mau pensamentus ku ña asons ku ka bali?
- TRENA: I ta fala di bu Futuru
Kuma ku N na fasi utru bias danti di un situason ki pirsis usa pensamentus ku asons bibliku?

Prosesu ku pasus di BPCBM



SINKU PASUS DI KADA LISON

Kada lison tene sinku pasus i kada pasu ta konkorda ku un tipu di fruta di kebur.



TEMA DI LISON - Purpara Terenu

Tema di lison i fasidu pa pudi purpara terenu di bu pensamentu ku di bu korson suma ku bu kumsa prosesu di diskubri bardadi ku Deus danu na Biblia.



STORIA BIBLIKU - Sumia Simentera

Storia Bibliku i un simentera ku ta sumiadu na alma, i ta padi, dipus i ta kirsi na kunsimentu ku bardadi. Antis di bu lei storia, gasta un tempu na orason, bu pidi Deus pa i yabri bu pensamentu ku bu korson pa bu risibi bardadis di Biblia.



PROSESU DI DISKUBERTA - Regua bu Pui Strumu

Usa e 9 purguntas pa regua i pa pui strumu na semintera, ku sedu Palabra di Deus, pa i pudi judau diskubri bardadis ku sta na storia. Bata pui sempri bu kabesa na "lugar" di personažens.

1. Ba kin ki personažens na storia
2. Kal ki asons di personažens na storia?
3. Kal ki disinvovimentu di storia?
4. Kal ki sintimentu ku kada personažen pudi spurmenta?
5. Kal ki skolia di kada personažen?
6. Kal ki motivus ku sta tras di kada skolia?
7. Kal ki pensamentus ku asons bibliku ku sta na storia?
8. Ke ku storia ta nsinan aserka di Deus ku pudi judan pa N amal minjor?
9. Ke ku storia ta nsinan aserka di ama ña kunpañer minjor?



STUDU ADISIONAL DI SKRITURA - Korta

Studu Adisional di Skritura pudu li pa juda libra di falsu nsinamentu ku pudi formadu fora di storia. Lei e skrituras pa e pudi judau ruspundi tudu purguntas ku bu pudi tene aserka di storias bibliku.



PURGUNTAS DI APLIKASON KU KONKLUSON - Kebra Fruta

Purguntas di Aplikason ku konkluson ta juda na prosesu di tira bardadis ku sta na kada storia i dipus pa pui elis na pratika na no vida di dia-a-dia. Bazia na pensamentus ku asons bibliku ku bu oja na Prosesu di Diskuberta pa bu ruspundi es purguntas aserka di bo propi.

- RAPRINDI: I ta fala di bu Pasadu
Kuma ku ña pensamentus aserka di Deus ku ña asons ta komparadu ku pensamentus ku asons bibliku ku N apreñdi na storia?
- KURIŽI: I ta fala di bu Presenti
Ke ku N pudi fasi pa kuriži ña mau pensamentus ku ña asons ku ka bali?
- TRENA: I ta fala di bu Futuru
Kuma ku N na fasi utru bias dianti di un situason ki pirsis usa pensamentus ku asons bibliku?

Jintis na da Deus Konta di Kuma ke Usa se Dons



TEMA DI LISON - Purpara Terenu

Biblia fala kuma jintis na da Deus konta di ke ku e fasi ku dons ku Deus da elis.

Versikulu di Distaki: Asin, kada un di nos na da konta di si kabesa danti di Deus. (Romanus 14:12)



STORIA BIBLIKU - Sumia Simentera

Intruduson tene informason pa judau ntindi storia.

Jesus na papiaba ku Si disipulus na komparason. Komparason i storia ku pudi usadu pa mostra o pa nsina un kusa.

Storia Bibliku kumsa li.

"Asin tamba, renu di seu i suma un omi ku na bai bias pa fora di si tera. I coma si tarbajaduris, i nkarga elis di si rikesa. I ntrega un sinku saku di uru, utru, i ntregal dus saku, utru i ntregal un saku di uru, konformi jitu di kada kin. Oca ki kaba, i bai pa tera lunju. Kil ku risibi sinku saku di uru i kumsa na fasi nogos, i ngaña mas sinku saku. Asin tamba suma kil ku risibi dus, i ngaña utru dus saku. Ma kil ku risibi un saku i bai koba koba, i sukundi uru di si patron. I pasa manga di tempu, patron di ki tarbajaduris ciga, i kumsa fasi konta ku elis. Kil ku risibi sinku saku di uru i ciga, i pursenta mas utru sinku saku, i falal: 'Siñor, bu ntregan sinku saku di uru; ali mas sinku ku N gaña.' Si patron falal: 'Abo i bon tarbajadur fiel, bu fasi diritu. Bu sedu fiel na puku; N na pou nkargadu di tarbaju mas importanti. Bin toma parti na kontentamentu di bu patron. I bin tamba kil ku risibi dus saku, i falal: 'Siñor, bu ntregan dus saku di uru; ali mas utru dus ki N ngaña ku elis.' Si patron falal: 'Abo i bon tarbajadur fiel, bu fasi diritu. Bu sedu fiel na puku; N na pou nkargadu di tarbaju mas importanti. Bin toma parti na kontentamentu di bu patron.' I bin tamba kil ku risibi un saku, i falal: 'Siñor, N sibiba kuma abo i omi risu, bu ta kebra nunde ku bu ka sumia, bu ta kuji nunde ku bu ka waga. E ku manda N medi, N sukundi bu saku di uru na con. Ali kil ki di bo.' Ma si patron ruspundil: 'Tarbajadur mau, prigisosu! Bu sibiba kuma N ta kebra nunde ku N ka sumia, N ta kuji nunde ku N ka waga! Suma ku bu sibi, bu dibi di puiba ña diñeru na banku; ora ku N ciga, N na risibilba ku juru. Patron rabida pa utrus, i fala: ' Bo tomal ki saku di uru, bo da kil ku tene des saku. Tudu kil ku tene, i ta buridu, pa i tene ciu, ma kil ku ka tene, te kil ki tene i na tiradu el. Bo ferca e tarbajadur ku ka bali la fora na sukuru. La e na cora, e na ñeme dinti" (Mateus 25:14-30)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Romanus 12:3-8; 1 Koríntius 10:31; 2 Koríntius 5:10; Efésius 4; Filipenses 4:14-19; Apokalipsi 20:11-15)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Biblia fala kuma tudu jintis na da Deus konta di kuma ke vivi se vida. Vida i un don di Deus. Deus misti pa no vida padi fruta

AMA DEUS

LISON
P-2

Mandamentu Mas Importanti



TEMA DI LISON - Purpara Terenu

Jesus da Si sigiduris ordi pa e fasi manga di kusas. Jesus misti pa tudu jintis sigil i pa e fasi ke ku El i misti. Kusa mas importanti ku sigiduris di Kristu ta fasi i ama Deus i sukuta Si palabras.

Versikulu di Distaki: Un pursor di lei ku obiba ki kombersa i oca kuma Jesus ruspundi elis diritu; i bai pertu del, i puntal: "Kal ki mandamentu mas garandi di tudu? Jesus ruspundi: "Mas garandi i es: 'Israel, sukuta! Siñor no Deus, i el son ki Siñor. Ama Siñor bu Deus ku tudu bu korson, ku tudu bu alma, ku tudu bu ntindimentu, ku tudu bu forsa.' Sugundu i es: 'Ama bu kumpañer suma bo propi.' I ka tem nin un mandamentu mas garandi di ki es." (Markus 12:28-31)



STORIA BIBLIKU - Sumia Simentera Intruduson tene informason pa judau ntindi storia.

Jesus staba ku Si disipulus.

Storia Bibliku kumsa li.

Jesus ku si disipulus e kontinua se kamiñu. I yentra na un tabanka; un minjer ku comadu Marta risibil na si kasa. I teneba un irmã ku comadu Maria, ku bin sinta na pe di Jesus pa obi si palabra. Marta staba tarpajadu ku manga di tarbaju. I bai pa Jesus, i falal: "Siñor, bu ka oja kuma ña irmã disan ami son ku tarbaju? Falal pa i bin judan." Jesus ruspundi i falal: "Marta, Marta, bu sta fadigadu, tarpajadu ku manga di kusa, ma un kusa son ki pirsis. Maria kuji kil ki mas minjor; i ka na tiradu el." (Lukas 10:38-42)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 22:36-37; Lukas 11:42; Tiagu 1:12; 1 Jon 2:4-5; 1 Jon 4)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Mandamentu mas importanti ku Jesus da i pa jintis amal i pa e sukuta Si palabras.

SUMIA PALABRA DI DEUS KU FIDELIDADI

UN VIDA KU TA PADI MANGA DI FRUTA



TEMA DI LISON - Purpara Terenu

Biblia i Palabra di Deus. Tudu sigiduris di Kristu e comadu pa obi e kungsi palabra di Deus. Manga di jintis ta obi Palabra di Deus, ma e ka ta vivi di akordu ku palabra di Deus. Biblia ta mostra kuma tudu jintis dibi di obi palabra di Deus i pa e vivit. Satanas ka misti pa jintis kungsi o ntindi palabra di Deus. Satanas ta misti tira palabra di Deus di no korson. Si no obi palabra di Deus, no vivi di akordu ku el, no vida na padi manga di frutas.

Versikulu di Distaki: Bu palabra i lampada pa ña pe, i lus pa ña kamiñu. (Salmus 119:105)



STORIA BIBLIKU - Sumia Simentera Intruduson tene informason pa judau ntindi storia.

Jesus na papia ku un grupu di manga di jinti. E grupu di jinti bin di differenti lugar.

Storia Bibliku kumsa li.

"Un labradur sai pa bai waga simentera. Oca ki na wagal, un parti kai lungu di kamiñu, i masadu; kacu kumel. Utru parti kai riba di pedra, i nasi, i seku, pabia kau ka moja. Utru kai na metadi di fididas, fididas kirsi juntu ku el, e rodial, e pertal. Utru kai na bon terenu, i nasi, i padi; kada un da sen." "Es i splikason di storia: Simentera i palabra di Deus. Kilis ku sta lungu di kamiñu i ki jintis ku ta obi palabra; dipus diabu ta bin tiral na se korson, pa ka e fia, e salba. Kilis ku sta riba di pedra tambi i kilis ku obi palabra, e risibil ku alegria, ma e ka tene rais. E ka ta tarda na vida di krenti; na tempu di tentason e ta disvia. Simentera ku kai na metadi di fididas i mostra kilis ku obi; mas dianti, kudadis ku rikesa ku sabura de vida e ta perta elis, e ka padi fruta diritu. Ma kil ku kai na bon terenu i mostra kilis ku obi palabra, e guardal na bardadi ku bon korson, e pega tesu, e ta da fruta. (Lukas 8:5-8, 11-15)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Salmus 119; Jon 10:27; Jon 15:16; Filipensis 1:9-11; Kolosensis 1:9-12; 1 Pedru 5:8)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Ora ku jintis sukuta palabra di Deus, i e vivi di akordu ku el, se vida ta padi bon fruta. I importanti pa sigiduris di Kristu ka disa Satanas o sabura des mundu tira Palabra di Deus na se korson.

Organiza Grupus Di Sigiduris Di Kristu

LOVOR KU ADORASON

- Pidi Deus pa l sta na metadi di juntamentu; na metadi di grupu o na bo aula di sigiduris di Kristu atraves di lovor ku adorason.
- Gasta un tempu pa gardisi Deus tambi pa da un tistimuñu publiku.

LISON DI DISKUBERTA KU APLIKASON

PASU 1 - TEMA DI LISON

- Fala di Tema di Lison i ku Versikulu di Distaki pa grupu.

PASU 2 - STORIA BIBLIKU

- Fala di Intruduson ku Storia Bibliku pa grupu.

PASU 3 - PROSESU DI DISKUBERTA

- Kungsi storia
- Ntindi Storia
- Diskubri Bardadis Bibliku

PASU 4 - STUDU ADISIONAL DI SKRITURAS

- Studa pensamentus ku asons bibliku ku grupu diskubri pa bu pudi sibi si na bardadi e sedu diskubertas bibliku.

PASU 5 - APLIKASON KU KONKLUSON

- Basia na diskubertas ku bu oja na storia pa ruspundi es purguntas. (NSINAMENTU)
- RAPRINDI: (Pasadu): Kuma ku ña pensamentus aserka di Deus ku ña asons ta komparadu ku pensamentus i ku asons bibliku ku N apreñdi na storia?
- KURIZI: (Presenti): Ke ku N pudi fasi pa kurizi ña mau pensamentus ku ña asons ku ka bali?
- TRENA: (Futuru): Kuma ku N na fasi utru bias dianti di un situason ki pirsis usa pensamentus ku asons bibliku?

VIVI NA KUMUNIDADI

KIRSI NA KRISTU

- Punta grupu, kuma ku bo aplika bardadis na bo vida disna di ultimu aula di sigiduris di Kristu?

DIVIDI BARDADI KU BU KUNPAÑER

- Punta grupu, kin ku bo na dividi e storia ku el di aos ate utru aula?

PREKUPA KU NESISIDADIS

- Punta grupu, kuma ku bo ruspundi nesisidadi di no grupu ku nesisidadi di kumunidadi disna di ultimu aula?
- Punta grupu, i ten kualker kusa o purblema dentru di grupu o kumunidadi ku dibi di sedu resolvidu?
- Punta grupu, kuma ku grupu pudi reazi dianti di nobu purblema?

Grupus Importanti

KUMPU KASA KU DEUS NA MORA NEL

Purmeru 52 lisons di libru di BPCBM e ta comadu Grupus Importanti. E Grupus Importanti ta leba un anu di studu; i tene kuaru grupu di lisons. Kada grupu tene 13 lisons. Grupus Importanti e basiadu na forma di un kasa. Kada un di ki kuaru grupu di lisons dadu nomi di diferenti parti di kasa. Kil kuaru partis diferenti e sedu: Pedra di Kantu, Alisersu, Muras, ku Kankra. Li bas, i sta splikason di kada un di ki kuaru grupu di lisons.



GRUPU DI LISON DI PEDRA DI KANTU - Relason Puru

Grupu di Lison di Pedra di Kantu i basiadu na storia di rekonsiliason. I kumsa ku lison di kuma ku Deus kria tudu kusas. Es bardadi ta mostra bon puntu di vista bibliku mundial. Sugundu lison ta mostra kuma jintis kumpudu di un manera diferenti ku restu di kiriason. No kumpudu pa un relason spesial ku Deus. Terseru ku kuartu lisons i aserka di kuma ku omi nganadu atraves di Satanas. Purmeru omis disobdisi Deus, rusultadu di kila i kuma no relason ku Deus kebradu. E lisons ta mostra garandi planus di Deus pa tisi jintis utru bias mas pa e pudi tene ki relason puru ku El.



GRUPU DI LISON DI ALISERSU - Fika na Kristu

E grupu di lison i basiadu na importansia di obdisi mandamentus di Jesus Kristu. Jesus fala: "Tudu kin ku ta sukuta e ña palabra, i fasi suma ku N fala, i parsi suma un omi jiru ku kumpu si kasa riba di pedra" (Mateus 7:24). Grupu di Lison di Alisersu ta mostra kuma ku no pudi kumpu un alisersu bibliku forti basiadu na stilu di vida di obdiensia.



GRUPU DI LISON DI MURAS - Vida Ku Ta Padi Fruta

No ta oja sempri pardi di un kasa pa ladu di fora. Mesmu kusa ta kontisi ku sigiduris di Kristu. Sigiduris di Kristu ta representa Deus na tera. Suma representantis di Deus, sigiduris di Kristu dibi di vivi di forma ke na mostra Deus pa kilis ku sta na se roda. E grupu di lison sta basiadu na garandi objetivu di familia di Deus na tera.



GRUPU DI LISON DI KANKRA - Bardadis Importanti

E ultimu grupu di lison i tene bardadis importanti na fe di un Kriston. Kankra ta kumpudu pa taja kusas strañu o kusas ku no ka misti pa i yentra dentru di kasa. Grupu di Lison di Kankra i fasidu pa taja kil nsinamentus falsu, pabia e lison ta mostra purmeru bardadi di fe di un Kriston.



Pedra di Kantu



Alisersu



Paredis



Kankra

Asin bo ka sedu mas stranjerus na un tera strañu, ma bo sedu ja di un tera juntu ku pobu di Deus; bo pertensi familia di Deus. Bo kumpudu riba di alisersu di apostulus ku anunsiaduris. Kristu Jesus, el propi ki purmeru pedra di kantu. El ku ta liga tudu ki kasa pa i kirsi pa i sedu templu santu pa Siñor. Na union ku el, abos tambi, juntu ku utrus, bo na ba ta kumpudu pa lugar nunde ku Deus ta mora na si Spiritu. (Efésius 2:19-22)

Disinvolvimentu Di BPCBM

PABIA KU BPCBM FASIDU?

Bo Padi Ciu Bo Multiplika (BPCBM) I un libru tamba i un metudu di studu ku fasidu pa pudi juda sigiduris di Kristu pa e ntindi Biblia i pa e vivi di akordu ku nsinamentus bibliku. Metudu di Libru di BPCBM ta leba sigiduris di Jesus pa e tene un vida ku ta padi fruta, tamba i ta juda elis tene un relason profundu ku Jesus Kristu.

BPCBM sta ja na manga di linguas i utru tradusons sta inda na fasidu normalmenti. I ten un lista di linguas ku BPCBM tradusidu ja nel na www.iBFAM.org. Si bu ka oja traduson na lingua ku bu misti, bu pudi kontakta Kada Kasa pa Kristu Internasional pa bu pidi traduson na nobu lingua.

KIN KU DISINVOLVI BPCBM?

Kada Kasa pa Kristu Internasional (KKKI) ku disinvolvi tamba i el ku tene diritu di autor di es libru comadu BPCBM. Li bas i sta objetivu di mison mundial di KKKI:

Kada Kasa pa Kristu sta pa sirbi Kurpu di Kristu pa purpara I pa junta krentis na tudu ladu pa e pudi partisipa ciu na leba Bon Noba di Jesus Kristu pa kada kasa na mundu ntidu, aumenta numeru di krentis, pa oja kumprimentu literal di Garandi Kumison.

Disna di 1946, KKKI ciganta Bon Noba di Jesus Kristu na 1.5 bilions di kasas na 215 nasons. Suma rusultadu di kila, mas di sen milion di jintis ntrega se vida pa Kristu.

TRIS OBJETIVUS UNIKU

KKKI ta tarbaja na tris objetivus uniku ku sedu esis:

1. Garandi Kumison dibi di lebadu literalmenti. Ne tempu li, distribuison sistematiku di literatura di kasa-a-kasa, tabanka-a-bakanka, i minjor manera pa tene sertesa kuma es tarbaju sta kompletu. (Mateus 28:19 ku Markus 16:15)
2. Sin union, no ka na pudi kaba e tarbaju di konta palabra di Deus pa tudu mundu. Asin, koperason di tudu grupus ivanjeliku i importanti pa kumprimentu di Garandi Kumison. Mas di ki 500 grupus di misons ku denominasons ivanjeliku na tudu mundu, e toma parti na tarbaju di konta palabra di Deus ku Kada Kasa pa Kristu ta organisa. (Lei Jon 17:21-23.)
3. Son orason, i pudi kebra tudu barera ku pudi tuji kumprimentu di Garandi Kumison. Pabia des, orason i kusa mas importanti na e kampaña. Na nivel ku orason ciga, i na sedu mesmu nivel ku mundu na ivanjelizadu. (Markus 11:22-23)



PEDRA DI KANTU

RELASON PURU

Deus propi ku marka pa tudu si naturesa kompletu sta na si Fiju. Pa meiu del i ta torna tisi tudu kusa, na seu suma na tera, pa el Deus, dipus ki pui pas pabia di sangi di Kristu darmadu na krus. (Kolosensis 1:19-20)

Indisi

Lisons:

| | |
|--|------------------|
| 1-1 Deus Ku Kumpu Seu Ku Tera..... | Pažina 20 |
| <i>I Kumpu Tudu Kusa</i> | |
| 1-2 Kriason Spesial di Omi..... | Pažina 21 |
| <i>No Kumpudu pa Tene Relason Spesial ku Deus i no Kumpaņer</i> | |
| 1-3 Satanas, N ganadur..... | Pažina 22 |
| <i>I ta bin pa Furta, Mata, ku Dana</i> | |
| 1-4 Adon ku Eva Disobdisi Deus..... | Pažina 23 |
| <i>Gosi Nona Vivi bas di Pekadu</i> | |
| 1-5 Familia Kujidu..... | Pažina 24 |
| <i>Relason Puru di Deus ku Abron</i> | |
| 1-6 Deus Proba Abraon..... | Pažina 25 |
| <i>Abraon Obdisi Deus</i> | |
| 1-7 I na Ten Vida Dipus di Mortu..... | Pažina 26 |
| <i>Vida Dipus di Mortu na Sedu Gloria o Nfernu</i> | |
| 1-8 Jesus Kristu..... | Pažina 27 |
| <i>El i Sen Pursentu Deus i Sen Pursentu Omi</i> | |
| 1-9 Planu di Rekonsiliason di Deus ku Omi..... | Pažina 28 |
| <i>I Toma Kastigu di No Pekadu i Torna kumpu mas No Relason</i> | |
| 1-10 Jesus N gaņa Mortu..... | Pažina 29 |
| <i>Si resureison Mostra Prova di Kin ki El</i> | |
| 1-11 Ke ku N dibi di fasi pa N salba?..... | Pažina 30 |
| <i>Fia</i> | |
| 1-12 Kuma Ku No Pudi Seta Amor di Deus?..... | Pažina 31 |
| <i>Ripindi</i> | |
| 1-13 Ami i Amigu di Jesus..... | Pažina 32 |
| <i>N kontinua na Si Amor Manera Ku N ta Obidisi Si Mandamentus</i> | |

DEUS KU KUMPU SEU KU TERRA

El Ku Kumpu Tudu Kusa



Tema di Lison - Purpara Terenu

I ten so un Deus. El I kungsi tudu kusas, I tene puder, I sta na tudu lugar, I kumpu tudu kusa oca nada ka tenba inda. Deus kumpu mundu N tidu so ku palabra. Deus kumpu tudu kusa pifitu pabia El Deus i pifitu.

Versikulu di Distaki: Siñor kumpu mundu ku si puder; i firmantal ku si jiresa; ku si ntindimentu i distindi seu. (Jeremias 51:15)



STORIA BIBLIKU - Sumia Simentera

Intruduson tene informason pa judau ntindi storia

Deus staba ja antis di mundu kumpudu. Biblia fala kuma Deus kumpu tera ku tudu kusa ku sta na el na seis dia. Na purmeru sinku dia, Deus kumpu lus, sol, lua, strelas ku seu, yagu, ku tera seku. Tambi i kumpu plantas ku tudu tipu di pis na mar ku tudu pastrus di seu ku pudi padi utrus kriatura di mesmu koldadi. Deus oja Si kriason i fala: "i sta bon." No storia na kumsa na sestu dia.

Storia Bibliku kumsa li.

Deus fala: "Pa i ten na tera limarias bibu, kada un suma si koldadi, limarias di kasa ku kilis ku ta rasta na con, ku kilis di matu, kada un suma si koldadi." Asin ki bin sedu. Deus kumpu limarias di matu suma se koldadi, ku di kasa suma se koldadi, ku tudu kilis ku ta rasta na con suma se koldadi. Deus oja elis tudu, i kontenti. Deus torna fala: "No kumpu jinti suma nos propi, no parsinti elis ku nos, pa e manda riba di pis di mar, riba di pastrus di seu, riba di tudu limarias, di kasa ku di matu, riba di tudu limarias ku ta rasta na con. Deus kumpu jintis suma El propi; I pui pa e parsil. I kumpu elis macu ku femia. Deus bensua elis, i fala elis: "Bo padi ciu, bo inci mundu, bo manda riba del. Bo manda riba di pis di mar, riba di pastrus di seu, riba di tudu limarias ku ta yanda na tera." (Kumsada 1:24-28)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Salmus 33:6-9; Isaias 40:21-28; Kolosensis 1:16; Hebreus 11:3; Apokalipsi 4:11)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Mundu ku tudu kusas ku sta na el i ka sedu asidenti. I ten un Kriadur, El i Deus. Tuduh kil ku Deus kumpu i pifitu.

KRIASON SPESIAL DI OMI

LISON

1-2

No Kumpudu pa Tene Relason Spesial ku Deus i ku no Kumpaņer



Tema di Lison - Purpara Terenu

Deus kumpu omi pa i sedu diferenti ku limarias. Omi kumpudu pa e pudi mostra naturesa di Deus. Deus kumpu omi pa i tene un relason spesial ku El. Deus tambi kumpu un algin pa juda omi

Versikulu di Distaki: N na ngabau, pabia bu kumpun na un manera meduņu, maravilyosu... (Salmus 139:14)



STORIA BIBLIKU - Sumia Simentera

Intruduson tene informason pa judau ntindi storia

Biblia kontanu kuma Deus kumpu seu ku tera ku tudu ku sta nel i Deus fala tudu Si kriason seduba "bon."

Storia Bibliku kumsa li.

Siņor Deus bin kumpu omi ku reia di con, i supral na si naris, i da folgu di vida. Omi bin sedu kriatura bibu. Siņor Deus fala: "I ka bon pa omi fika el son. N na fasil un algin ku na judal, pa i sedu si Kumpaņer." Oca ku Siņor Deus toma reia, i kumpu tudu limarias di matu, ku tudu pastrus di seu, i leba elis pa Adon, pa jubi kuma ku Adon na coma elis. Tudu ki limarias bibu ku Adon coma se nomi, e fika ku ki nomi. Asin Adon pui nomi na tudu limarias di kasa, ku pastrus di seu, ku limarias di matu. Ma omi ka teneba kin ku na judal, pa i sedu si Kumpaņer. Asin Siņor Deus pui omi pasa ku sonu, i tira un os di si kostela, i fica karni na ki kau. Ku ki kostela ku Siņor Deus tiraba di omi, i kumpu minjer, i lebal pa Adon. (Kumsada 2:7, 18-22)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Salmus 24:1; Salmus 100:3; Salmus 139:13-16; Romanus 8:38-39; Efésius 5:28, 31)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Deus kumpu omi ku minjer di un manera spesial. E sedu mesmu. E kumpudu pa vivi juntu. E kumpudu tambi pa tene un relason ku Deus.

SATANAS, N GANADUR

LISON
1-3

I ta bin pa Furta, Mata, ku Dana



Tema di Lison - Purpara Terenu

Dimoniü ten. Satanas i dimoniü. Satanas sta kontra kreatura pirfitu di Deus. Pabia Satanas sta kontra kreatura pirfitu di Deus, i bin pa tera na forma di serpenti pa dana kil relason spesial ku omi teneba ku Deus.

Versikulu di Distaki: Ladron ta bin son furta, i mata, i dana. Ma ami N bin pa jinti tene vida, pa e tenel manga del. (Jon 10:10)



STORIA BIBLIKU - Sumia Simentera

Intruduson tene informason pa judau ntindi storia

Deus puiba omi ku minjer na un jardin bonitu pa e mora. Deus fala omi kuma i pudi kume fruta di kualker arvuri menus un. Deus fala, "Busta libri pa kume fruta di tudu arvuri ku sta na jardin; ma arvuri ku ta da kunsimentu di ben ku mal, ka bu kumel, pabia dia ku bu kumel, bu na muri." Un dia Satanas bin na forma di serpenti i N gana Eva.

Storia Bibliku kumsa li.

Serpenti i mas jiruba pa fasi mal di ki tudu limarias di matu ku Siñor Deus kumpu. I punta minjer: "I bardadi, asin ku Deus fala, pa kabo kume fruta di tudu e arvuris na jardin?" Minjer fala serpenti: "No pudi kume fruta di tudu arvuris na jardin, ma fruta di arvuri ku sta na metadi di jardin, Deus fala pa ka no kumel, nin pa ka no toka nel, pa no ka muri." Serpenti fala minjer: "Bo ka na muri, pabia Deus sibi kuma, dia ku bo kume ki fruta, bo uju na yabri, bo na sedu suma Deus, bo na kungsi ben ku mal." Minjer oja ki arvuri kuma i bon pa kume, i bonitu na si uju; i kumsa dijäl pa i pudi dal ntindimentu. I tira si fruta, i kume, i da tambi si omi; kila kumel ku el. Siñor Deus punta minjer: "Ke ku manda bu fasi es?" Minjer falal: "Serpenti ku nganan; N kumel." Siñor Deus fala serpenti: "Suma ku bu fasi es, bu sta maldisuadu mas di ki tudu limarias di kasa, ku tudu limarias di matu. Ku bu bariga ku bu na rasta ku el; i puera ku bu na kume tudu dias di bu vida. N na pui inimisadi na metadi di bo ku minjer, na metadi di bu jorson ku jorson di minjer. I na masau na kabesa. Abo bu na murdil na kalkañada." (Kumsada 3:1-6, 13-15)



PROESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Markus 1:9-13; 2 Tesalonisensis 2:8-10; 1 Pedru 5:8; Apokalipsi 12:9)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Satanas, ku si mau pensamentu i lebal pa i sta kontra Deus tambi kontra Si planus. Tarbaju di Satanas na tera kumsa oca ku i tenta Eva. Satanas N gana Eva pa i disobdisi Deus. Satanas sta kontra omi, tambi i sta kontra relason spesial di omi ku Deus.

ADON KU EVA DISOBDISI DEUS

LISON
1-4

Gosi Nona Vivi bas di Pekadu



Tema di Lison - Purpara Terenu

Satanas bin i N gana Eva pa i disobdisi Deus. Disobdisi Deus i pekadu. Deus ta kastiga pekadu. Pabia di pekadu di Adon ku Eva, se relason ku Deus kebradu. Pagamentu di pekadu i dur, sufrimentu, ku mortu.

Versikulu di Distaki: Pekadu yentra na mundu pabia di un omi; i tisi mortu. Asin tamba mortu pasa pa tudu jintis pabia tudu peka. (Romanus 5:12)



STORIA BIBLIKU - Sumia Simentera

Intruduson tene informason pa judau ntindi storia

Purmeru omi ku minjer ku Deus kumpu e dadu nomi di Adon ku Eva. Arvuri ne storia i arvuri ku ta da kunsimentu di ben ku mal. Deus fala elis kuma e pudi kume fruta di tudu arvuri, ma pa ka e kume fruta di arvuri ku ta da kunsimentu di ben ku mal.

Storia Bibliku kumsa li.

Minjer oja ki arvuri kuma i bon pa kume, i bonitu na si uju; i kumsa dijai pa i pudi dal ntindimentu. I tira si fruta, i kume, i da tamba si omi; kila kumel ku el. Elis dus, se uju yabri, e rapara kuma e sta nun. E toma fojas di figera, e kusi, e bisti. Adon ku si minjer obi Siñor Deus na pasia na jardin na fuska-fuska. E sukundi di si pурсensa na metadi di arvuris di jardin. Ma Siñor Deus coma Adon, i puntal: "Nunde ku bu sta?" Adon falal: "N obiu na jardin, N sinti medu, pabia N sta nun. E ku manda N sukundi." Deus puntal: "Kin ku mostrau kuma bu sta nun? Nta bu kume fruta di ki arvuri ku N dau ordi pa ka bu kumel?" Adon fala: "Minjer ku bu dan pa i sedu Kumpañer, i el ku dan fruta di ki arvuri; N kumel." Siñor Deus punta minjer: "Ke ku manda bu fasi es?" Minjer falal: "Serpenti ku nganan; N kumel." Deus fala minjer: "N na buriu manga di dur na ora di partu; ku dur ku bu na tene fiju. Bu na sinti diseju pa bu omi; el i na manda riba di bo." Deus fala Adon: "Suma bu sukuta fala di bu minjer, bu kume fruta di ki arvuri ku N falau pa ka bu kume, con na sedu maldisuadu pabia di bo; ku forsa di tarbaju ku bu na kume del, tudu dias di bu vida. I na padiu pe di fidida ku paja brabu; bu na kume plantas di matu. Bu na kume bu kumida ku kalur di bu rostus, tok bu riba pa con nunde ku bu tiradu; pabia bu kumpudu di reia; bu na torna sedu reia." (Kumsada 3:6-13, 16-19)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Isaias 59:2; Romanus 3:23; Romanus 6:23; Tiagu 1:13-15; 1 Jon 3:5)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Pabia di falta di konfiansa ku disobdiensia, i pui relason di Deus ku omi kebra. Un Deus pifitu ka pudi tolera pekadu. Tudus omi peka. Pagamentu di pekadu i dur, sufrimentu, ku mortu.

FAMILIA KUJIDU

LISON
1-5

Relason Puru di Deus ku Abron



Tema di Lison - Purpara Terenu

Rusultadu di pekadus di Adon ku Eva pasa pa tudu jinti. Deus fasi planu pa torna ki relason ku tenba na metadi di omi ku El. Deus fasi purmesa pa un omi ku comadu Abron. Deus purmiti Abron kuma atraves di si familia, jinti na rekonsilia ku Deus.

Versikulu di Distaki: Siñor fala Abron: "Sai na bu tera, na metadi di bu parentis, na kasa di bu pape, bu bai pa un tera ku N na mostrau. N na fasiu un garandi nason, N na bensuau, N na fasi bu nomi pa i sedu garandi; bu na sedu un benson. N na bensua kilis ku bensuau. N na maldisua kilis ku maldisuau. Tudu rasas na mundu na sortiadu pabia di bo." (Kumsada 12:1-3)



STORIA BIBLIKU - Sumia Simentera

Intruduson tene informason pa judau ntindi storia

Abron i un omi ku obdisi oca Deus papia ku el. Deus kuji familia di Abron pa i sedu familia ku na ngaña Satanas i abensua tudu jintis. Abron ka fiaba si Deus na dal un fiju ku si minjer. Abron ku si minjer ka teneba fijus, ma Abron teneba fiju ku servu di si minjer. E fiju comadu Ismael.

Storia Bibliku kumsa li.

Oca Abron teneba noventa i novi anu, Siñor bin pa el, i falal: "Ami i Deus ku ten tudu puder. Yanda ña danti, sin kulpa. N na konfirma ña kontratu ku bo, N na buri bu jorson tok i ciu." Abron npina ku rostu na con. Deus falal: "Na ña ladu, ali ña kontratu ku bo. Bu na sedu pape di manga di nason. Bu nomi ka na sedu mas Abron, i na sedu Abraon, pabia N fasiu pa bu sedu pape di manga di nason. Na pou pa bu padi ciu; N na fasiu pa bu sedu nasons; reis na sai na bo. N na pui ña kontratu na metadi di mi ku bo, ku bu fijus dipus di bo, ku se jorsons, un kontratu ku na fika pa sempri, pa N sedu bu Deus, Deus di bu jorson dipus di bo. Deus torna fala Abraon: "Sarai, bu minjer, bu ka na comal mas Sarai, ma si nomi na sedu Sara, pabia N na bensual, N na dau un fiju ku el. N na bensual; i na sedu mame di nasons; reis di nasons na sai nel." Abraon mpina ku rostu na con, i ri, i fala na si sintidu: "Ami i un omi di sen anu. Nta N pudi padi un fiju? O sara pudi preña ku idadi di noventa anu? Abraon fala Deus: "N misti son pa bu pui uju riba di Ismael." Deus falal: "Bardadi, Sara bu minjer i na padi un fiju; bu na comal nomi di Isaki. N na firmanta ña kontratu ku el pa i sedu kontratu ku ka ta kaba, pa si jorson dipus del. (Kumsada 17:1-7, 15-19)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Kumsada 15:1-6; Isaias 51:1-2; Gálatas 3:16-18; Hebreus 11:8-12; Tiagu 2:23)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Planu di Deus pa tisi omi pertu Del, i kumsa ku Abraon. Deus purmiti kuma atraves di familia di Abraon, tera tudu na sta abensuadu. Deus purmiti kuma atraves di familia di Abraon pekaduris un dia na libertadu.

DEUS PROBA ABRAON

LISON
1-6

Abraon Obdisi Deus



Tema di Lison - Purpara Terenu

Tudu purmesa ku Deus fasi pa Abraon dipindiba di vida di Isaki. Deus proba Abraon. Abraon obdisi mandamentus di Deus. Abraon fiaba kuma Deus ka na konta mintida.

Versikulu di Distaki: Fe ku pui Abraon, oca ki probadu, i pursenta Isaki. El ku risibi purmesas i staba pruntu pa sakrifika ki uniku fiju, kontudu Deus falalba. "Na Isaki ku bu jorson na sai." Abraon fasi di konta kuma, Deus ten puder te di lantandal di mortu. Na un sintidu i di mortu ki risibil. (Hebreus 11: 17-19)



STORIA BIBLIKU - Sumia Simentera

Intruduson tene informason pa judau ntindi storia

Na tempu pasadu, Deus puiba sakrifisiu di sangi pa purdon di pekadu. Fasi un sakrifisiu, i seduba atu riliziosu pa limpa pekadu. I seduba tamba un atu di lovor.

Storia Bibliku kumsa li.

Deus falal: "Toma Isaki, bu fiju un son, kil ku bu ama, bu bai pa tera di Moriá, bu matal riba di altar, bu kemal suma oferta riba di un di montañas ku N na mostrau." Abraon lanta di mandrugada, i purpara si buru, i leba dus di si kriadus, ku si fiju Isaki, i findi leña pa oferta kemadu, i pega kamiñu, i bai pa lugar ku Deus kontalba. Na terseru dia, Abraon yalsa si uju, i oja ki kau di lunju. I fala si kriadus: "Bo fika li ku buru. Ami ku ña fiju no na bai te la. Ora ku no kaba adora Deus, no na riba mas pa bos." Abraon toma leña pa oferta kemadu, i karganta si fiju Isaki. El i toma fugu ku faka na mon; e bai, elis dus. Isaki fala si pape Abraon: "Papa." Abraon kudil: "Ña fiju, alin li." Isaki falal: "Ali fugu ku leña, ma nunde karnel pa oferta kemadu?" Abraon falal: "Ña fiju, Deus propi ku na danu karnel ku no pirsisa pa oferta kemadu." Asin elis dus e bai juntú. Oca ke ciga na ki kau ku Deus falal, Abraon kumpu la un altar. I ruma leña, i mara si fiju, i ditandal na altar riba di leña. I distindi si mon, i toma faka pa mata si fiju. Ma anju di Siñor grital desdi seu, i comal: "Abraon! Abraon!" Abraon kudi i falal: "Alin li." I falal: "Ka bu pui mon na rapas; ka bu fasil nada. Gosi N sibi kuma bu ten medu di Deus. Bu ka tujin bu fiju un son." Abraon yalsa uju, i oja un karnel macu si tras, ku N baransaba ku si cifris na matu. I bai, i toma karnel, i sakrifikal suma oferta kemadu na konta di si fiju. (Kumsada 22:2-13)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Kumsada 22:15-18; Romanus 4:1-24; Tiagu 2:21-22)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Abraon staba pruntu pa sakrifika Isaki suma oferta kemadu; es ta mostra fe ku Abraon teneba na Deus. Abraon obdisi Deus. Oca ku Abraon probadu pa Deus, i fiaba tamba i obdisiba Deus. Manga di anu dipus di storia di Abraon, Deus purparaba ja un oferta pifitu pa pekadu di tudu jinti.

I NA TEN VIDA DIPUS DI MORTU

LISON
1-7

Vida Dipus di Mortu na Sedu Gloria o Nfernu



Tema di Lison - Purpara Terenu

Skritura ta nsinanu aserka di vida dipus di mortu. Dipus di mortu, utru jinti na bai pa nfernu i utrus na bai pa seu. Seu i nunde ku Deus sta nel. Seu na inci di alegria pabia no na sta ku Deus. Nfernu i lugar di kastigu duru. Jintis ku sta na nfernu e sta siparadu di Deus pa sempri. Deus na julga tudu jinti.

Versikulu di Distaki: Pagamentu di pekadu i mortu, ma kil ku Deus ta danu di grasa i vida ku ka ta kaba, pabia di Kristu Jesus no Siñor. (Romanus 6:23)



STORIA BIBLIKU - Sumia Simentera

Intruduson tene informason pa judau ntindi storia

Biblia ta usa komparason pa nsinanu bardadi. Komparason i storias ku tene signifikadu mas profundu. Na es komparason "Fiju di Omi" i un nomi di Deus.

Storia Bibliku kumsa li.

Jesus da elis utru komparason, i fala: "Renu di seu i suma es ku N na konta bos. Un omi sumia bon simentera na si lugar, ma oca jinti durmi, si inimigu bin, i sumia na metadi di arus un paja ku ka bali ma ku parsi ku arus; i bai si kamiñu. Oca plantas bin kirsi tok fruta na sai, arus brabu bin sai tambi. Tarbajaduris di ki omi bai pa el, e puntal: "Siñor, anta i ka bon simentera ku bu sumiaba na bu lugar? Nunde ku arus brabu sai nel?" I fala elis: "Un inimigu ku fasi e tarbaju." Tarbajaduris puntal: "Bu misti pa no bai rinkal?" Omi fala elis: "Nau, pabia bo pudi bai rinkal juntu ku arus. Bo disa elis dus pa e kirsi juntu te na kebur. Na ora di kebur N ta konta kebraduris pa e kebra arus brabu purmeru, pa e maral pa kema, ma arus, e ta juntal na ña bema." I ruspundi elis, i fala: "Kin ku sumia bon simentera i fiju di omi. Lugar i mundu. Bon simentera i kilis ku pertensi renu di Deus. Arus brabu i kilis ku pertensi ki malvadu. Inimigu ku sumia elis i Diabu. Kebur i fin di mundu. Kebraduris i anjus. Suma ku arus brabu juntadu, i kemadu na fugu, asin ki na bin sedu na fin di mundu. Fiju di omi na manda si anjus, e na junta na si renansa tudu kilis ku na pui utrus pa e kai, ku kilis ku ta fasi pekadu, e na bota elis na kau di fugu garandi; la e na cora, e ñeme dinti. Na ki tempu jintis justu na lampra suma sol na renu di se pape. Kin ku tene oreja pa i obi, pa i sukuta. (Mateus 13:24-30, 37-43)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 13:47-50; Mateus 25:31-46; Markus 9:47-48; Jon 14:1-3; Filipensis 3:20; 1 Tesalonisensis 4:13-18; Apokalipsi 20:12-15; Apokalipsi 21-22)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Deus na julga tudu jinti dipus de muri. Seu i un lugar di manga di kontentamentu i vida. Nfernu i lugar di manga di dur ku sufrimentu.

El I Sen Pursentu Deus i Sen Pursentu Omi



Tema di Lison - Purpara Terenu

Na tudu parti di Biblia, Deus staba na fasi planu pa tisi omi utru bias mas pertu del, pa kumpu kil relason ku kebraba na metadi di Deus ku omi. Oca tempu ciga, Deus manda Si Fiju Jesus Kristu pa rekonsilia omi ku Deus.

Versikulu di Distaki: Siñor propi i na da bos un sinal: Un bajuda na bin preña, i na padi un fiju ku na comadu Emanuel. (Isaias 7:14)



STORIA BIBLIKU - Sumia Simentera

Intruduson tene informason pa judau ntindi storia

Biblia kontanu kuma Jesus bin atraves di familia di Davi ku bin atraves di jorson di Abraon.

Storia Bibliku kumsa li.

Nasimentu di Jesus Kristu kontisi de manera: Maria si mame i seduba bajuda ku na bin kasa ku José, ma antis de kasa, Maria bin oja kuma i preña ku puder di Spiritu Santu. José, si rapas suma i sedu bon, i ka misti danal nomi. Pabia di kila, i pensa disal sin fala ningin nada. Manera ki na pensaba ne kusa, un anju di Siñor parsil na suñu, i falal: "José, fiju di Davi, ka bu ten medu di kasa ku Maria, pabia kil ku sta na si bariga i puder di Spiritu Santu. I na padi un fiju macu; bu na pul nomi di Jesus, pabia i na salba si pobu di se pekadu." E kusa tudu i sedu pa pudi fasi kil ku Siñor falaba ja na boka di anunsiadur ku fala i da folgu : "Un bajuda na bin preña, i na padi un fiju macu ku na comadu Emanuel," ku sedu: "Deus sta ku nos." José korda na suñu, i fasi suma ku anju di Deus falal; i kasa ku Maria, ma nunka i ka ten relason seksual ku el tok i padi si purmeru fiju; i pul nomi di Jesus. (Mateus 1:18-25)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 16:13-20; Mateus 26:63-64; Lukas 1:28-35; Jon 1:1-14; Jon 3:16; Filipensis 2:5-11; Kolosensis 1:15-20; Kolosensis 2:9)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus Kristu seduba sen pursentu Deus i sen pursentu omi. Jesus Kristu mandadu pa kumpu relason ku kebra na metadi di Deus ku omi.

PLANU DI REKONSILIASON DI DEUS KU OMI

LISON
1-9

I Toma Kastigu di No Pekadu i Torna kumpu mas No Relason



Tema di Lison - Purpara Terenu

Deus ama tudu jinti. Jinti kumpudu pa e ama Deus i pa e tene kumuñon ku Deus. Satanans N gana Adon ku Eva pa e disobdisi Deus. Disobdisi Deus i pekadu. Pekadu dana kil relason pifitu ku staba na metadi di Deus ku omi. Deus purmitiba omi kuma kil relason pifitu na metadi di Deus ku omi na tornadu. Deus purmiti Adon kuma un dia, un algin di si familia na masa Satanans na kabesa. Deus purmiti kuma I na bensua nasons na tera atraves di familia di Abraon. Deus kumpri si purmesa oca ki manda Si Fiju Jesus Kristu.

Versikulu di Distaki: Oca inda no sedu fraku, Kristu muri pa jintis mau na tempu propi. (Romanus 5:6)



STORIA BIBLIKU - Sumia Simentera

Intruduson tene informason pa judau ntindi storia

Deus manda Si uniku fiju. Si nomi i Jesus Kristu. Si nansimentu i sedu milagri. I sedu sen pursoru Deus i sen pursoru omi. I vivi i kirsi ma nunka i fasi pekadu. I fasi manga di milagris tamba i nsima manga di bardadi pa jintis jiru. Manga di šefis riližiosu ka gostaba di Jesus pabia di kila, e mistiba matal. Gubernadur julga Jesus i diklara kuma El i seduba nosenti. Pa pudi fasi jintis kontenti ku el, gubernadur piriti pa jintis suta Jesus i e pregal na krus. Krus i un strumentu di kastigu. Deus fala kuma i pabia di no pekadu ku Jesus sutadu i kondenadu pa muri.

Storia Bibliku kumsa li.

Na ki ora soldadus di gubernadur leba Jesus pa sedi; tudu konpañia di tropas junta na si roda. E dispil, e bistil suma rei ku un kapa burmeju, e kumpu un koroa di fidida, e pul na kabesa; e pui un kana na mon direita, e finka juju si dianti, e fasil trosas, e fala: "Viva, Rei di Judeus!" E kuspil, e tomal kana, e na dal ku el na kabesa. Dipus de kaba fasil trosas, e dispil ki kapa, e tornal si ropa, e lebal pa i krusifikadu. Oca e na sai di ki lugar, e kontra ku un omi ku comadu Simon, di prasa di Sireni. E obrigal pa i leba krus di Jesus. Oca ke ciga na un lugar comadu Gólgota, ku signifika lugar di kaku di kabesa, e da Jesus biñu jagasidu ku fel pa i bibi, ma dipus di purbal, i nega bibil. Dipus de krusifikal, e juga sorti pa rapati si ropa, [pa i pudi sedu suma ku anunsiadur fala: "E rapati ña ropa anti delis; e juga sorti riba di ña kamisoti."] E sinta la pa guardal. E pui um kusa skritu riba di si kabesa pa mostra si akusason, ku fala: "ES I JESUS, REI DI JUDEUS." Dus ladrons krusifikadu juntu ku el, un na direita, utru na skerda. Disna di me-dia tudu tera bida sukuru te tris ora. Jesus torna grita utru bias, i para da folgu. (Mateus 27:27-38, 45, 50)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Isaias 53:5-6; Markus 10:45; Jon 1:29; Efésius 1:7; 1 Timótiu 1:15; 1 Pedru 2:24)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Mortu di Jesus Kristu na krus i yabri kaminhu pa tudu jinti tene relason spesial ku Deus. Jesus paga presu kompletu di no pekadus. Jesus Kristu i uniku oferta pifitu pa pekadu. Jesus Kristu toma no lugar. No ka meresiba es prenda spesial. No dadu el pabia Deus ama tudu jinti. Kilis ku fia na Jesus Kristu, e risibi predenda ku Jesus Kristu danu, e sta rekonsiliadu ku Deus.

JESUS N GAÑA MORTU

LISON
1-10

Si Resureison Mostra Prova di Kin ki El



Tema di Lison - Purpara Terenu

Oca ki staba inda na tera, Jesus kontaba ja kuma I na muri pa no pekadu ma i na lanta di mortu. Jesus Kristu muri na krus ma I lanta di mortu. Oca ku Jesus Kristu lanta di mortu, I mostra kuma na bardadi El I Deus. Tudu ke ku I fala o I manda i bardadi.

Versikulu di Distaki: Kusa mas importanti i es: N pasanta pa bos kil ku N risibi, kuma Kristu muri pa no pekadu suma ku Skritura fala. I nteradu; na terseru dia i lantandadu di mortu, suma ku Skritura fala. (1 Koríntius 15:3-4)



STORIA BIBLIKU - Sumia Simentera

Intruduson tene informason pa judau ntindi storia

Dipus di mortu di Jesus na krus, alguns di si amigu toma Si kurpu. E ntera Jesus na un koba. Gubernadur da ordi pa pui un pedra garandi na entrada di koba. Soldadus staba la pa guarda koba pa ka algin furta kurpu di Jesus. Na terseru dia dipus di Si mortu dus minjer baiba pa koba. E oja kuma pedra tiraduba na koba, dus anjus staba sintadu nel.

Storia Bibliku kumsa li.

Anju fala minjeris: "Ka bo medi. N sibi kuma bo na buska Jesus ku krusifikadu. Ika sta li, pabia i lanta di mortu, suma ki fala. Bo bin jubi lugar nunde ki ditandadu nel. Bo bai di presa, bo fala si disipulus kuma i lanta ja di mortu, i na bai bo dianti pa Galileia; bo na ojal la. Ali N konta bos el." E disa koba dipresa, ku medu ma tambi ku garandi alegria, e kuri pa bai konta si disipulus. (Mateus 28:5-8)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Atus 2:22-24; Romanus 1:3-4; Romanus 8:33-34; 1 Koríntius 15:12-22; 1 Pedru 1:3)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus lanta di mortu. Mortu ka budiba sugura Jesus Kristu pabia El i Deus. El i ki oferta puru pa pekadu. Jesus Kristu i Deus di vida. Jesus Kristu mostra kuma I ka sedu so un bon nsinadur o anunsiadur. Jesus Kristu mostra kuma I tene tudu puder ku otridadi. Jesus Kristu mostra kuma El i Rei di tera.

KE KU N DIBI DI FASI PA N SALBA?

LISON
1-11

Fia



Tema di Lison - Purpara Terenu

Jesus muri ma l lanta di mortu pa jintis pudi tene vida. Tudu jinti comadu pa tene fe na Jesus Kristu, pa e fia kuma El i Fiju di Deus. Tudu jinti pudi sedu salbu i libertu di kastigu di pekadu si e fia na Jesus i e diklara ku se boka kuma El i Deus. Tudu jinti pudi kuji pa fia na Deus pa e sedu salbu o pa nega Deus. Deus misti pa tudu jintis salba.

Versikulu di Distaki: Deus ama jinti di mundu dimas, tok i da si uniku Fiju, pa tudu kil ku setal ka ta pirdi, ma i ta tene vida ku ka ta kaba. Deus ka manda si Fiju pa i bin kondena mundu, ma pa i salbal. (Jon 3:16-17)



STORIA BIBLIKU - Sumia Simentera

Intruduson tene informason pa judau ntindi storia

Dipus di Jesus lanta di mortu, l parsi pa si disipulus. Un di disipulus di Jesus ku tene nomi di Tome ka staba la oca ku Jesus parsi pa si disipulus. El, Tome, i ka ojaba Jesus disna ki pregadu na krus. Pa fia kuma algun kusa i bardadi sin ojal o sintil, i ta comadu fe.

Storia Bibliku kumsa li.

Un di ki dosi disipulu, Tome, ku ta comadu Jemia, ka staba ku elis oca Jesus bin. Si Kumpañeris falal: "No oja Siñor." Tome fala elis: "Si N ka oja sinal di pregu na si mon, si N ka miti ña dedu na ki sinal, si N ka miti ña mon na si pontada, N ka na fia." Oca oitu dia pasaba ja, si disipulus staba dentru utru bias. Tome staba la ku elis. Kontudu portas ficadu, Jesus ciga, i parsi na se metadi, i fala elis: "Pas ta sta ku bos." Dipus i fala Tome: "Pui bu dedu li, bu jubi ña mon; ciganta bu mon, bu mitil na ña pontada; ka bu sedu duvidosu, ma sedu krenti." Tome ruspundil: "Ña Siñor! Ña Deus!" Jesus falal: "Tome, bu fia pabia bu ojan. Sortiadu i kilis ku ka oja, ma e fia." Jesus fasi manga di utru milagri dianti di si disipulus ku ka sta skritu ne libru. Ma e kusas sta skritu pa bo fia kuma Jesus i Mesias, Fiju di Deus, pa ora ku bo fia nel, bo ta tene vida na si nomi. (Jon 20:24-31)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Jon 3:16-21; Atus 10:43; Atus 16:25-31; Romanus 6:23; Romanus 10:9-10; Gálatas 2:20; Gálatas 3; Efésius 2:8-9; Hebreus 11)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus Kristu toma kastigu di no pekadus. Skritura fala kuma jinti na tene vida ku ka ta kaba si e fia kuma Deus lantanda Jesus di mortu. Algin ka pudi sedu Kriston sin fe. Fe signifika fia na Jesus Kristu mesmu ku no ka ojal. Fe signifika fia kuma Jesus Kristu lanta di mortu pa purda no pekadus.

KUMA KU NO PUDI SETA AMOR DI DEUS?

LISON
1-12

Ripindi



Tema di Lison - Purpara Terenu

Ripindi signikifa mudansa di korson ku pensamentu. Ripindi, tamba signifika, pensa o aži di un manera diferenti aserka di pekadu tamba aserka di Deus. I signifika pa sta kontra pekadu suma ku Deus sta kontra el. Ripindimentu ta rusulta na mudansa di komportamentu di pekadu.

Versikulu di Distaki: Na ki tempu ku pasa, Deus fica uju pa se falta di kunsimentu, ma gosi i da ordi pa tudu omis na tudu lugar pa e ripindi. (Atus 17:30)



STORIA BIBLIKU - Sumia Simentera

Intruduson tene informason pa judau ntindi storia

Jesus seduba un garandi nsinadur; tamba I fasiba manga di milagris, i kuraba kilis ku pirsisaba. I ta tenba multidon di jintis pa tudu ladu Ki bai.

Storia Bibliku kumsa li.

Jesus entra na Jerikó, i na pasa na prasa. I staba la un omi riku ku ta comadu Zakeu, šef di kobraduris di mpustu. I na buskaba oja kin ki Jesus, ma, suma i kurtu, i ka pudi ojal, pabia jinti ciu. I kuri danti, i subi na un pe di figu brabu pa i pudi ojal, suma ki tenba ku pasa la. Oja ku Jesus ciga na ki lugar, i jubi pa riba, i ojal, i falal: "Zakeu, ria di presa, pabia aos N misti diskansa na bu kasa." Zakeu ria di presa, i risibil ku kontentamentu. Tudu ki jinti ku mati kumsa na rui, e na fala kuma Jesus bai gasija na kasa di un omi ku ta fasi pekadu. Zakeu lanta, i fala Siñor: "Jubi, Siñor, N na da pobris metadi di ña rikesa. Si kontra N gana algin na kualker kusa, N sta pruntu pa tornal kuaru bias mas." Jesus falal: "Aos salbason bin pa e kasa; e omi tamba i fiju di Abraon. Fiju di omi bin pa buska kil ku pirdi, pa salbal." (Lukas 19:1-10)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 3:2; Mateus 4:17; Markus 1:15; Lukas 5:32; Lukas 13:15; Atus 2:31-41, Atus 3:19-20)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

No fiansa na Jesus Kristu ta lebanu pa ripindimentu. Ora ku no ripindi, no korson ku no pensamentu ta mudadu. Ora ku no korson ku no pensamentu mudadu, no asons di pekadu tamba ta mudadu. Kilis ku fia na Jesus ta vivi di manera diferenti di kilis ku mora na se roda ku ka fia na Jesus.

AMI I AMIGU DI JESUS

LISON
1-13

N kontinua na Si Amor Manera Ku N ta Obdisi Si Mandamentus



Tema di Lison - Purpara Terenu

Suma sigiduris di Kristu, no sedu amigus di Deus. Amigus di Deus ta kungsi Deus di un manera spesial. Amigus di Deus ta ama Deus, tambí e ta ama N utru. Amigus di Deus ta fia nel, tambí e ta obdisi Si mandamentus.

Versikulu di Distaki: Ña karnel ta obi ña vos; ami N kungsi elis; e ta sigin. (Jon 10:27)



STORIA BIBLIKU - Sumia Simentera

Intruduson tene informason pa judau ntindi storia

Jesus na papia ku Si disipulus I na da elis lison. Pape ku Jesus na papia del i Deus Pape.

Storia Bibliku kumsa li.

Filipi falal: "Siñor, si bu mostranu bu pape, i ta justa." Jesus falal: "Filipi, N sta manga di tempu ku bos; bo ka kunsin inda? Kin ku ojan, i oja ña pape. Kuma ku bu na falan pa N mostra bos ña pape? Suma ku ña pape aman, ami tambí N ama bos; bo kontinua na ña amor. Si bo obdisi ña mandamentus, bo ta kontinua na ña amor, di mesmu manera ku N obdisi mandamentus di ña pape, N kontinua na si amor. N konta bos e kusa pa ña alegria sta sempri na bos, pa bo alegria sta kompletu. Es i ña mandamentu: pa bo ama N utru suma ku N ama bos. Ningin ka ten amor mas garandi di ki es, di da si vida pa si amigus. Bo ta sedu ña amigus si bo fasi ke ku N manda bos. N kana coma bos mas di servus, pabia servu ka ta sibi ke ku si Siñor ta fasi; ma N na coma bos amigus pabia N konta bos tudu ku N obi di ña pape. (Jon 14:8-9; 15:9-15)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 7:16-20; Jon 14:15-23; Kolosensis 1:10; 2 Pedru 1:3-8; 1 Jon 4:7-8; 1 Jon 5:1-5)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Suma sigiduris di Kristu, no sedu amigus di Deus. Suma amigus di Deus ku no sedu, no comadu pa sukuta vos di Deus i pa obdisil. Suma amigus di Deus, no comadu pa ama utrus suma ku Jesus Kristu amanu.



ALISERSU

FIKA NA KRISTU

Bo sta na mi, ami N ta sta na bos. Suma ku ramu, el propi, ka ta pudi padi si i ka sta na si pe, asin tambi abos, si bo ka sta na mi. (Jon 15:4)

INDISI

Lisons:

- 2-1 Sedu Batisadu.....Pažina 34**
Fia na Siñor
- 2-2 Anos i Lus di Mundu.....Pažina 35**
Konta Mundu Kin ki Jesus
- 2-3 Tene Bon Relason ku Utrus.....Pažina 36**
Purda Kilis ku Peka Kontra Bo
- 2-4 Ka Bu Kai Cai.....Pažina 37**
Ka Bu Kubisa Utrus
- 2-5 Kasamenti i Sagradu pa Deus.....Pažina 38**
Deus Ka Gosta di Kaba-Kasamenti
- 2-6 Seta Justisa.....Pažina 39**
Vivi un Esemplu di Amor di Deus
- 2-7 No Dibi Di Ama No Inimigus.....Pažina 40**
Deus Ama Tudu Jinti
- 2-8 Pati Simola.....Pažina 41**
Deus ta Mporta Ku Kilis Ku Ka Tene
- 2-9 Orason.....Pažina 42**
I Signifika Papia ku Deus i Sukuta Si Vos
- 2-10 Guarda Rikesa na Seu.....Pažina 43**
No Dibi Di Respita Deus Ku No Vida i Ku No Rikesa
- 2-11 Ka bu Prekupa.....Pažina 44**
Deus Sibi Ke Ku Bu Pirsisa Del, I Ta Kuida Di Bu Purbulemas
- 2-12 Ka Bu Julga Utrus.....Pažina 45**
Deus I Juis
- 2-13 Pidi, Buska, Bati Porta.....Pažina 46**
Deus Ta Ruspundi Orason Di Fe

Fia na Siñor



Tema di Lison - Purpara Terenu

Batizmu na yagu i mandamentu di Deus. Biblia fala, dipus ku no seta Kristu, no dibi di batisadu. Batizmu i ora ku un nobu Krenti na Jesus mburgujantadu na yagu dipus i tiradu. Batizmu i un simbulu di un nobu nasimentu ku ta akontisi dipus di no seta Kristu. Batizmu i un simbulu ku ta mostra utrus kuma anos i sigiduris di Kristu.

Versikulu di Distaki: Asin, bo bai pa jinti di tudu nasons, bo fasi elis ña disipulus. Bo batisa elis na nomi di Pape, di Fijdu ku di Spiritu Santu. (Mateus 28:19)



STORIA BIBLIKU - Sumia Simentera

Intruduson tene informason pa judau ntindi storia

Filipi seduba sigidur di Kristu ku ta kontaba Bon Noba di Renu di Deus.

Storia Bibliku kumsa li.

Filipi bai pa prasa di Samaria, i na kontaba elis di Kristu. Oca ku multidon di jinti obi Filipi, e oja milagris ki na fasi, elis tudu e para atenson na kil ki na fala, pabia spiritu mau sai na manga di jinti ku garandi gritu; i kuradu manga di jinti ku teneba duensa di molisimentu, tudu ku mankus. I tenba garandi alegria na ki prasa. I staba la un omi comadu Simon ku tarda ta fasi arti di jambakus, i na N ganaba jinti di Samaria, i ta fala kuma el i algin garandi. Tudu jinti ta sukutal diritu, jinti altu ku koitadis; e ta fala kuma es algin i puder di Deus ku ta comadu Puder Garandi. E ta sukutal pabia i tarda ki na N gana elis ku arti di jambakus. Oca ke seta palabra di Filipi ku konta elis Bon Noba di renu di Deus, ku nomi di Jesus Kristu, omis ku minjeris tudu batisa. Simon propi seta Jesus tambi, i batisadu. I fika juntu ku Filipi. Ora ki oja milagris ku kusas garandi ki fasi i ta dimira dimas. (Atus 8:5-13)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Atus 2:38; Atus 18:8; Ronanus 6:4-5; Gálatas 3:27; Kolosensis 2:12)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Biblia fala kuma Krentis dibi di batisadu. Batizmu na yagu ta mostra ke ku ta sta dentru di no korson ora ku no seta Jesus suma no Siñor i Salbadur. Batizmu i un tustumuñu ku ta mostra utrus kuma no sedu sigiduris di Jesus Kristu.

Konta Mundu Kin ki Jesus



Tema di Lison - Purpara Terenu

Kriston i kin ku ta sigi Jesus Kristu. Skritura fala kuma kristons dibi di sedu lus di mundu i pa e mostra mundu kin ki Jesus.

Versikulu di Distaki: “Abos i lus di mundu. Un prasa ku sta na monti i ka pudi sukundi. Kanderu ka ta sindidu pa i pudu bas di un kašoti, ma riba di un stanti altu, pa i pudi numia kasa diritu pa tudu kilis ku sta la. Asin tambi ku bo dibi di fasi bo lus pa i numia dianti di jintis, pa e pudi oja kusas bon ku bo ta fasi, pa e pudi ngaba bo pape ku sta na seu. (Mateus 5:14-16).



STORIA BIBLIKU - Sumia Simentera

Intruduson tene informason pa judau ntindi storia

Jesus sintaba pertu di un fonti. Un minjer binba na fonti pa buska yagu. Jesus pidi ki minjer yagu pa i bibi. Jesus kontu minjer kuma I pudi patil yagu ku ta da vida ku ka ta kaba. Jesus kontu minjer kusas aserka di si vida; Jesus ka pudiba kungsi vida di ki minjer si ka jiresa di Deus. Jesus kontu minjer kuma El i Deus. Minjer dimira palabras di Jesus, i fiaba na tudu ku Jesus fala.

Storia Bibliku kumsa li.

Minjer disa si puti, i bai pa prasa, i fala jinti: “Bo bin Jubi un omi ku kontan tudu kusas ku N fasi na ña vida. N ta es i ka Mesias?” Ki jinti sai na prasa, e bai pa Jesus. Manga delis di Samaritanu di ki prasa seta Jesus, pa palabra ku minjer testifika kuma, i falal tudu kusa ki fasi na si vida. E bai pa Jesus, e pidil pa i fika ku elis. I fika ku elis dus dia. Manga di jinti setal pabia di si palabra. E fala minjer: “Gosi i ka pabia di bu palabra ku pui no fia, pabia anos propi no obil, no sibi kuma i el, na bardadi, I salbadur di mundu.” (Jon 4:28-30, 39-42).



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Markus 16:15-16; Lukas 11:33-36; Atus 1:8)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus i Lus di bardadi, I Salbadur di mundu. Jesus kontu si sigiduris pa e sedu lus di mundu, asin, pa jinti pudi sibi kin ki Jesus.

TENE BON RELASON

KU UTRUS

Purda Kilis ku Peka Kontra Bo

LISON

2-3



Tema di Lison - Purpara Terenu

Jesus nsina Si disipulus pa e vivi na pas ku se Kumpaņer. Krentis nsinadu pa e sedu bon pa utru jintis i pa e purda kilis ku yara elis. Vivi na pas ku utru jinti i signifika pa purda sempri kilis ku yaranu.

Versikulu di Distaki: Pabia des, ora ku bu na bai pui bu oferta na altar, si bu lembra kuma bu ermon tene un kusa kontra bo, disa bu oferta danti di altar, bu bai fasi pas ku bu ermon purmeru, dipus bu ta riba, bu bin da bu oferta pa Deus. (Mateus 5:23-24)



STORIA BIBLIKU - Sumia Simentera

Intruduson tene informason pa judau ntindi storia

Un di disipulus di Jesus punta Jesus kantu bias ki dibi di purda si ermon si i na peka sempri kontra el. Pa ruspundil, Jesus konta e komparason:

Storia Bibliku kumsa li.

“E ku manda renu di seu i pudi komparadu de manera: I tenba un rei ku misti fasi konta ku si tarbajaduris. Oca i kumsa na fasi konta, e tasil un omi ku dibil milyons di kuntu. Suma ki ka teneba nada pa paga, si patron da ordi pa i bindidu, el ku si minjer ku si fijus ku tudu kusa ki tene, pa i pudi paga dibida. Ki omi kai, i mborka danti di si patron, i falal: `Siņor, ten pasensa ku mi; N na pagau tudu.’ Si patron sinti garandi pena del, i disal, i purdal tudu ki dibida. Ki tarbajur kaba sai, i kontra ku un si kolega ku dibil sen mueda di prata. I pegal, i kumsa na forkal i na falal: `Pagan kil ku bu dibin!’ Si Kumpaņer mborka bas di si pe, i pidil, i falal: `Ten pasensa ku mi; N na pagau.’ Ma el i ka misti; i lebal pa bai fical na kalabus te ora ki pagal dibida. Utru di se kolegas e oja ke ku pasa, e fika tristi dimas, e bai konta se patron tudu ku pasa. Se patron coma ki omi, i falal: `Tarbajadur malvadu! N purdau tudu ki dibida pabia bu pidin. N ta abo tambi bu ka dibi di ten pena di bu Kumpaņer suma ku N ten pena di bo?’ Si patron, ku raiba ki ten, i N tregal na mon di kastigaduris te ora ki paga tudu ki dibi. Asin tambi ku ña Pape ku sta na seu na bin fasi bos si kada un di bos ka purda di korson si ermon.”
(Mateus 18:23-35)



PROESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 6:14; Markus 11:25-26; Lukas 11:4; Lukas 17:3-4; 2 Korintius 2:5-11; Efésius 4:32; Kolosensis 3:12-14)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Sigiduris di Kristu comadu pa purda N utru suma ku Deus ta purda kada un di nos. Sigiduris di Kristu nsinadu pa vivi na pas ku jintis ku sta na se roda.

KA BU KAI CAI

Ka Bu Kubisa Utrus



Tema di Lison - Purpara Terenu

Jesus nsina si disipulus pa ka e kai cai. Jesus nsina kuma kubisa algin, i pekadu.

Versikulu di Distaki: "Bo obi ke ku kontadu: `Ka bu dita ku algin ku bu ka kasa ku el.' Ma N na konta bos kuma, tudu algin ku Jubi minjer ku mau pensamentu, i kai ja ku el na si korson. (Mateus 5:27-28)



STORIA BIBLIKU - Sumia Simentera

Intruduson tene informason pa judau ntindi storia

Davi seduba rei di Israel ku tene fama dimas. Davi oja un minjer na laba kurpu, i kubisa ki minjer. Kil minjer seduba minjer di un kumandanti di tropas di Davi. Nomi di kil kumandanti i Urias, eteu. Davi da ordi pa si servus pa e tisil kil minjer. Davi dita ku el, kila bin preña. Dipus Davi manda Urias pa guera, i Urias muri na guera. Deus ka kontentiba ku Davi. Deus manda profeta Natan pa papia ku Davi.

Storia Bibliku kumsa li.

Siñor manda Natan pa Davi. Oca Natan yentra nunde Davi, i falal: "I tenba dus omi na un tabanka, un son i riku, untru koitadi. Ki riku teneba manga di karnel ku baka, ma ki koitadi ka teneba nada, si i ka un fiju di karnel pikininu ki kumpraba, i kria. I kirsiba na si mon juntu ku si fijus; i ta rapati si kumida ku el; i ta bibi na si kopu, i ta durmiba na si ragas, i sedu suma si fiju. "Un dia un ospri bin pa ki omi riku; kila ka misti toma un di si propi karnelis o baka pa i kusña pa ki algin. I bai toma ki fiju di karnel di ki omi koitadi, i purparal pa si ospri." Asin Davi paña raiba ciu kontra ki omi, i fala Natan: "N jurmenta pa vida di Siñor kuma ki omi ku fasi e kusa dibi di muri! I na paga kuaru bias pa ki karnel ki toma, suma ki fasi e kusa i ka ten dur di ki omi." Natan fala Davi: "Abo ku sedu ki omi! Asin ku Siñor Deus di Israel na falau: `N unjiu rei riba di Israel; N librau na mon di Saul, N dau si renansa ku si minjeris. Tambi N fasiu rei riba di Israel ku Judá. Si es seduba pikininu, N pudi buriu inda mas. Pabia di ke ku bu N juti palabra di Siñor, bu fasi kusa ki mau si dianti? Bu mata ki eteu Urias ku spada, bu toma si minjer bu kasal. Bu mata Urias ku spada di fijus di Amon. (2 Samuel 12:1-9)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Saida 20:14; Ditus 6:32; 1 Koríntius 6:13-20; Efésius 5:3-5; Kolosensis 3:1-11; Tesalonisensis 4:3-8; Hebreus 13:4)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Kai cai i falta di sedu fiel na kasamenti. Kai cai i pekadu na uju di Deus. Jesus nsina Si disipulus pa ka e fasi pekadu sexual. Jesus nsina kuma pensamentu ku ka bali i suma kai cai.

I SAGRADU PA DEUS

Deus Ka Gosta di Kaba-Kasamenti



Tema di Lison - Purpara Terenu

Jesus nsina kuma pa Deus, kasamenti i importanti dimas.

Versikulu di Distaki: Ma N na konta bos: tudu omi ku kaba ku si minjer, si i ka pabia i pañal cai, i na pul pa i fasi adulteriu. Kil ku kasa ku minjer ku dispididu, i na fasi adulteriu. (Mateus 5:32)



STORIA BIBLIKU - Sumia Simentera

Intruduson tene informason pa judau ntindi storia

Garandi multidon di jinti ta sigiba Jesus pabia I ta nsinaba jinti tamba I ta fasiba milagris. Fariseus tamba ta binba pa El, e ta fasil manga di purguntas. Fariseu seduba šef riližiosu dentru di riližion di Judeus. Fariseus ta sigiba manga di leis ku Deus daba Moises. Moises i un omi ku gia pobu di Israel pa manga di anus antis di Jesus padidu.

Storia Bibliku kumsa li.

Utru fariseus bai pa el pa spurmental, e puntal: "Konformi no lei, un omi pudi kaba kasamenti ku si minjer pa kualker motivu?" Jesus ruspundi, i punta elis: "Bo ka lei na Skritura, na kumsada, Kriadur kumpu elis macu ku femia? Deus fala elis: 'Pabia di kila, omi ta disa si pape ku si mame pa i junta ku si minjer. Elis dus e ta sedu un kurpu son.' De manera e ka ta sedu mas dus, ma e ta sedu un kurpu son. E ku manda, kil ku Deus junta, omi ka dibi di rapatil." E puntal: "N ta, pabia di ke ku Moises disanu ku e lei, si algin misti dispidi si minjer, i ta pasal kartadi dispidida?" Jesus fala elis: "Pabia bo tene korson duru; e ku manda Moises seta pa bo dispidi bo minjeris, si ka pabia i pañal cai, i kasa ku utru minjer, i fasi adulteriu. [Tamba kil ku kasa ku ki minjer ku dispididu, i fasi adulteriu.]" (Mateus 19:3-9)



PROESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Kumsada 2:20-24; 1 Korintius 7; Efésius 5:21-28)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

I Deus ku ordena kasamenti. I sagradu pa Deus. Sigiduris di Kristu dibi di fasi tudu ke pudi pa guarda se kasamenti.

SETA JUSTISA

Vivi un Esemplu di Amor di Deus



Tema di Lison - Purpara Terenu

Jesus nsina si disipulus aserka di falta di Justisa. Jesus kontu Si disipulus pa ka e torna mal pa mal. Jesus nsina kuma Krentis dibi di tene bon Esemplu, Krentis dibi di vivi un vida di amor ku bondadi ku tudu jinti.

Versikulu di Distaki: Ma ami N na kontu bos: Ka bo ntema ku kin ku na fasi bos mal, ma si algin dau bofotada na ladu direita, paral ki utru ladu. Si algin misti lebau pa tribunal pa tirau kamisa, ka bu tujil kasaku tambu. Si algin forsau pa bu bai un kilometru, bai ku el dus kilometru. (Mateus 5:39-41)



STORIA BIBLIKU - Sumia Simentera

Intruduson tene informason pa judau ntindi storia

Judas i un di disipulus di Jesus. Šefis riližiosu mistiba mata Jesus. Judas falsia Jesus pabia di diñeru. Ne storia, Jesus staba na papia ku tudu si disipulus menus Judas. Jesus sibiba ja kuma Judas na bin falsial.

Storia Bibliku kumsa li.

Oca i na papia inda, i ciga multidon di jinti. Un di dosi disipulu, ku comadu Judas, staba dianti delis. I bai pa da Jesus bežu. Jesus puntal: “Judas, bu na falsia fiju di omi ku un bežu?” Kilis ku staba ku el, oca e oja ke ku na bin sedu, e puntal: “Siñor, no na da elis ku spada?” Un delis busi spada, i da kriadu di šef di saserdotis ku el, i sapal oreja direita. Jesus fala elis: “Bo disa, i justa!” I tokal na oreja, i kural. Jesus rabida pa šefis di saserdoti, ku kapiton di guarda di kasa di Deus, ku garantis ku bai pa prindil, i punta elis: “Bo bin ku spada ku manduku pa bin prindin, suma un ladron? N ta staba ku bos tudu dia na kasa di Deus; Nunka bo ka pui mon riba di mi. Ma es i bo ora; i sukuru ku ten ja forsa.” (Lukas 22:47-53)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Markus 12:28-37; Lukas 6:32; Jon 4:7-8; Jon 13:34; Romanus 12:17-21; 1 Korintius 4:12; 2 Korintius 12:10; Efésius 5:1-2; 1 Pedru 1:22; 1 Pedru 3:9; 1 Jon 3:11)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus fala Si disipulus pa ka e torna mal pa kilis ku fasi elis mal. Sigiduris di Kristu ta reaži di un manera diferenti na situasons diferenti pabia e kungsi amor di Jesus. Jesus nsina kuma Krentis dibi di vivi un vida di amor ku bondadi ku tudu jinti.

NO DIBI DI AMA NO INIMIGUS

LISON

2-7

Deus Ama Tudu Jinti



Tema di Lison - Purpara Terenu

Jesus nsina Si disipulus pa ama i pa ora pa se inimigus. Jesus nsina kuma i difisil ama kilis ku ta tratanu mal. Jesus fala si disipulus kuma e sedu differenti ku utrus jinti pabia e dibi di ama kilis ku sedu difisil pa ama.

Versikulu di Distaki: Ma ami, N na fala bos: Bo ama bo inimigu, [Bo fala ben pa kilis ku ta fala mal di bos, bo fasi ben pa kilis ku ta odia bos,] bo ora pa kilis ku ta maltrata bos, e pirsigi bos, pa bo pudi sedu fiju di bo Pape ku sta na seu, pabia I ta fasi pa si sol sai pa jintis bon ku jintis mau; Si cuba ta kai riba di jinti justu ku injustu. (Mateus 5:44-45)



STORIA BIBLIKU - Sumia Simentera

Intruduson tene informason pa judau ntindi storia

Oca Jesus na viviba na tera, I tene manga di inimigus. Es inimigus odiaba Jesus. Jesus maltratadu, I kondenadu pa mori pabia di Si inimigus.

Storia Bibliku kumsa li.

Oca ke na lebal, e paña un omi comadu Simon, di prasa di Sireni, ku na binba di matu. E kargantal krus na kosta pa i lebal tras di Jesus. Garandi multidon na baiba si tras, ku utru minjeris ku na cora, e na miskiña. Tambi e leba utru dus omi ku seduba kriminosu, pa e muri juntu ku Jesus. Oca e ciga na lugar comadu Kaku di Kabesa, la ke krusifikal, ku ki kriminosus, utru na skerda un son na direita. Jesus fala: "Ña Pape, purda elis, pabia e ka sibi ke ke na fasi." E juga sorti pa rapati si ropa. Pobu sikidu, e na jubi. Tambi otridadis di Judeus na fasilba trosa, e na fala: "I salba utru jinti; pa I salba si kabesa si el i Kristu, kil ku Deus kuji!" Soldadus tamba na fasilba trosa, e bai nunde el, e dal vinagri, e falal: "Salba bu kabesa si abo i rei di Judeus!" Tambi riba del i staba skritu e palabra: "ES I REI DI JUDEUS." Un di ki kriminosu ku pindrada njurial, i puntal: "N ta abo i ka Kristu? Salba bu kabesa, bu salbanu tamba." Ma ki utru jusia ku el, i puntal: "Abo inda bu ka medi Deus? Bu na sufri mesmu kastigu suma e omi li. Pa nos i justu, pabia no na risibi kil ku no mersi pa mal ku no fasi, ma es, nin un mal i ka fasi." Dipus i fala: "Jesus, lembra di mi ora ku bu yentra na bu renu." Jesus falal: "N na kontau bardadi, aos propi bu na sta ku mi la na paraisu." (Lukas 23:26-27, 32-43)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Markus 12:28-31; Lukas 6:27-38; Jon 13:34; Romanus 12:17-21)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus nsinanu kuma no dibi di ama i no dibi di ora pa kilis ku ta pirsiginu. Jesus ora pa kilis ku pirsigil i e matal. Sigiduris di Kristu dibi di ama se inimigu suma ku Jesus fasi.

PATI SIMOLA

Deus ta Mporta Ku Kilis Ku Ka Tene



Tema di Lison - Purpara Terenu

Jesus nsina si disipulus aserka di pati kin ku ka tene. Sigiduris di Kristu ka ta pati simola na metadi di jinti, so pa jinti pudi oja kuma e na pati simola. Ora ku un Krenti pati simola, Deus ta ojal, i ta bensual na seu.

Versikulu di Distaki: Ora ku buna da simola, ka bu mon skerda sibi ke ku bu direita na fasi, pa bu simola pudi dadu sukundidu na sigridu, pa bu Pape ku ta oja kusa ku ta fasidu na sigridu pudi bin pagau. (Mateus 6:3-4)



STORIA BIBLIKU - Sumia Simentera

Intruduson tene informason pa judau ntindi storia

Disipulus di Jesus puntal ke ku na bin akontisi na fin di mundu. Jesus fala elis kuma na fin di mundu El i na sedu kil Rei ku na Julga tudu jinti.

Storia Bibliku kumsa li.

Tudu nasons na juntadu si dianti, I na rapati elis na dus grupu suma ku bakiadur ta rapati karnel ku kabra. I na pui karnel na si direita; kabras i na pui elis na si skerda. Dipus, Rei na fala kilis ku sta na si direita: `Bo bin, abos ku ña Pape bensua, pa bo toma yardansa na renu ku purparadu pa bos disna ku mundu kumpu. N teneba fomi, bo dan di kume; N teneba sedi, bo dan di bibi; N seduba ospri, bo gasijan; N staba nun, bo dan di bisti; N duensi, bo visitan; N staba na kalabus, bo bai jubin.' "Jinti justu ta ruspundil, e puntal: `Siñor, kal tempu ku no ojau ku fomi, no dau di kume? O ku sedi, no dau di bibi? Kal tempu ku no ojau suma ospri, no gasijau? O nun, no dau di bisti? Kal tempu ku no ojau duenti, o na kalabus, no bai jubiu?' Rei na ruspundi elis: "Na bardadi, N na konta bos, kada bias ku bo fasilba pa un di ña ermons mas pikininu, ami propi ku bo fasil." "Dipus i na fala tambi kilis ku sta na si skerda: `Bo lunjusi di mi, maldisuadus, pa fugu ku ka ta paga, ku purparadu pa diabu ku si anjus, pabia N teneba fomi, bo ka dan di kume; N teneba sedi, bo ka dan di bibi; N seduba ospri, bo ka gasijan; N staba nun, bo ka dan di bisti; N staba duenti, tambi na kalabus, bo ka bai visitan." "Elis tambi e puntal: "Siñor, kal tempu ku no ojau ku fomi, o ku sedi, o ospri, o nun, o duenti, o na kalabus, no ka bai judau?' I na ruspundi elis: `Na bardadi N na konta bos, kada bias ku bo ka trata un de pikininus, i ami ku bo ka trata." "Esis na si skerda e na bai pa kastigu ku ka ta kaba, ma jinti justu na bai pa vida ku kata kaba." (Mateus 25:32-46)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Salmus 82:3; Ditus 19:17; Ditus 28:27; Jeremias 22:3; Mateus 5:42; Mateus 19:21)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus ta mporta ku pobris. Jesus nsina Si sigiduris pa pati kilis ku ka tene. Jesus na paga kilis ku ta pati simola.

ORASON

I Signifika Papia ku Deus i Sukuta Si Vos



Tema di Lison - Purpara Terenu

Jesus nsina si disipulus kuma e dibi di ora sempri. Orason signifika papia ku Deus i obi Si vos. Ora ku no na ora, Deus ta obinu.

Versikulu di Distaki: Ma ora ku bu na ora, yentra dentru di bu kuartu, bu fica porta, bu papia ku bu Pape ku ka ta ojadu. Bu Pape ku ta oja kil ku ta fasidu na sigridu i ta bin pagau. (Mateus 6:6)



STORIA BIBLIKU - Sumia Simentera

Intruduson tene informason pa judau ntindi storia

Un rei mau ku ta comadu Erodís, i odiaba Krentis dimas. Rei Erodís kumsa mata krentis. Soldadus prindiba Pedru ku sedu un lider di Igreža . E na matalba tambí.

Storia Bibliku kumsa li.

Asin Pedru staba guardadu na kalabus, ma Igreža ka para pidi Deus pa el. Na noti ku Erodís na mansiba pa pursental danti di pobu, na ki mesmu noti, Pedru na durmiba na metadi di dus soldadus, maradu ku dus korenti; guardas staba danti di porta, e na guarda kalabus. Di repenti un Anju di Siñor parsí; lus lampra na kalabus. Anju panga Pedru na ombra, i kordal, i falal: “Lanta di presa!” Korenti kai na si mon. Anju falal: “Mara panu, bu kalsa sandalias.” I fasi asin. Anju falal mas: “Kubri ku bu kapa, bu bin ña tras.” Anju sai; Pedru sai si tras, sin i ka ntindi kuma kusa ku Anju na fasi i bardadi. I na kudaba kuma i un vison. Oca ke pasa purmeru ku sugundu guarda, e ciga na porton di feru ku ta da pa prasa. Porton yabri el son. E sai, e yanda un rua ntidu. Anju disparsi, i disal. Sintidu di Pedru bin riba pa el; i fala: “Gosi N sibi na bardadi kuma Siñor manda si Anju pa i libran na mon di Erodís, di tudu ku pobu Judeu na peraba.” Dipus di ntindi klaru, i bai pa kasa di Maria, mame di Jon ku tene tambí nomi di Markus, nunde ku manga di jinti juntaba, e na ora. Oca ki konki porta di kintal, un bajuda ku comadu Rodi sai pa sukuta. I rapara fala di Pedru; pa kontentamentu i ka yabri porta, ma i kuri pa dentru, i konta kuma Pedru staba la fora. E falal: “Bu ka sta diritu!” Ma el i na ntemaba kuma i bardadi. E falal: “I si anju.” Pedru kontinua na konki. Oca ke yabri porta, e ojal, e fika spantadu. I sana elis mon pa e kala, i konta elis kuma ku Siñor tiral na kalabus; i fala: “Bo fika bo konta Tiagu ku utru ermons.” I sai ki ora, i bai pa utru lugar. (Atus 12:5-17)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(2 Krónikas 7:14; Salmus 32:5-11; Jeremias 29:12; Jeremias 42:3; Mateus 5:44; Mateus 7:11; 1 Tesalonisensis 5:17)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus nsinaba Si disipulus ora. Si bu na ora, Deus ta obiu. Jesus nsinanu pa no ora sempri; pa no ora si no pirsisa di un kusa. Si bu ora, milagri ta kontisi.

No Dibi Di Rispita Deus Ku No Vida i Ku No Rikesa



Tema di Lison - Purpara Terenu

Pagamentu ku jinti na risibi na seu i na dipindi di kuma ku e sedu fiel pa Deus ku se vida i ku se rikesa. Sigiduris di Kristu dibi di vivi pa pagamentu ke na risibi na seu.

Versikulu di Distaki: Ka bo junta bo rikesa ne mundu li, nunde ki ten nel bagabaga ku feružen ku ta dana tudu, nunde ku ladrons ta koba e furta, ma bo junta bo rikesa na seu, nunde ku bagabaga ku feružen ka ta dana kusa, nunde ku ladrons ka ta koba, e ka ta furta. Pabia nunde ku bo rikesa sta nel, la ku bo korson na sta tambi. (Mateus 6:19-21)



STORIA BIBLIKU - Sumia Simentera

Intruduson tene informason pa judau ntindi storia

Jesus kumbidaduba pa sia na kasa di Lazaru. I ka tarda ku Jesus lantandaba Lazaru di mortu. Na metadi di ospris ku kumbidaduba pa sia, i staba: Lazaru ku si dus irmas, Marta ku Maria, tambi ku disipulus di Jesus.

Storia Bibliku kumsa li.

Seis dia antis di Paskua, Jesus bai pa Betânia, nunde ku Lazaru staba nel, ki Lazaru ku muriba, ku Jesus lantanda di mortu. E fasil sia la. Marta na sirbiba; Lazaru i un di kilis ku staba juntu ku Jesus na mesa. Maria toma meiu kilu di un pumada karu, di nardu puru, ku ta cera sabi, i unta Jesus na pe, i limpal pe ku si kabelu. Tudu kasa fika i na cera sabi. Un di si disipulus comadu Judas Iskariotis, kil ku bin falsia Jesus, punta: "Pabia di ke ku e purfumu ka bindidu pa trisentus mueda di prata, pa pobris dadu el?" Judas fala e kusa, i ka pabia i gusta di pobris, ma pabia el ku ta teneba bolsa di diñeru; i seduba ladron, i ta furta kusa ku ta puduba nel. Jesus fala: "Bo disal. I guarda e purfumu pa i sirbi pa dia di ña nteru. Sempri bo na tene pobris juntu ku bos, ma ami, N ka na sta sempri ku bos." (Jon 12:1-8)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Markus 8:34-38; Lukas 12:32-34; 1 Korintius 3:10-17; 1 Timótiu 6:17-19)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus nsinanu pa no fasi kusas ku na fika pa sempri. Deus na paga kilis ku rispital ku se vida i ku se rikesa.

KA BU PREKUPA

Deus Sibi Ke Ku Bu Pirsisa Del, I Ta Kuida Di Bu Purbulemas



Tema di Lison - Purpara Terenu

Jesus fala, El i na kuida di no vida ku no Purbulemas. Si no na pensa ciu na no purbulemas, i signifika kuma no ka tene fe na Jesus.

Versikulu di Distaki: Ka bo fadiga ku dia di amaña, pabia dia di amaña i ta toma konta di si kabesa. Kada dia ta justa ku si propi mal. (Mateus 6:34)



STORIA BIBLIKU - Sumia Simentera

Intruduson tene informason pa judau ntindi storia

Jesus staba ku Si disipulus na praia. Manga di si disipulus ciga di tarbaja na ki praia suma piskaduris.

Storia Bibliku kumsa li.

Na ki dia, oca ku sol na kai, Jesus fala si disipulus: “No kamba pa utru banda.” E fika jinti, e leba Jesus na barku ki sintaba nel. Utru barkus bai ku el tambi. Turbada garandi lanta, ku bentu; maron na kamba tok barku na inci. Jesus na durmi na popa, ku kabesa riba di turbuseru. E kordal, e puntal: “Mestre, bu ka oja kuma no na muri?” I korda, i papia risu ku bentu, i fala mar: “Kala, bu keta.” Bentu para; mar torna tudu ben. I punta elis: “Ke ku manda bo panta asin? Bo ka fiansa na mi inda?” E panta dimas, e punta N utru: “E omi i kin ku te bentu ku mar ta obdisi?” (Markus 4:35-41)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Ditus 3:5-6; Lukas 12:22-25; Gálatas 2:20; Hebreus 11:8-12; 1 Pedru 1:21)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus ta kuida di tudu na no vida. No dibi di pui no fe i no fia na El.

KA BU JULGA UTRUS

Deus I Juis



Tema di Lison - Purpara Terenu

I ka bon pa no julga utru jinti. Tudu jinti i pekadur, pabia di kila, so Deus ku pudi julga.

Versikulu di Distaki: "Ka bo julga ningin pa ka bo julgadu, pabia manera ku bo julga utrus, asin tamba ku bo na julgadu. Ku mesmu midida ku bo Midi, el ku bo na mididu ku el tamba. Pabia di ke ku bu rapara puera na uju di bu ermon, bu ka rapara padas di po ku sta na bu uju? (Mateus 7:1-3).



STORIA BIBLIKU - Sumia Simentera

Intruduson tene informason pa judau ntindi storia

Fariseus kunsiba leis riližiosu diritu. E ta jubiba sempri si jinti na kumpri lei di riližion o nau.

Storia Bibliku kumsa li.

Parmaña sedu i riba pa kasa di Deus. Tudu jinti na binba nunde el; i sinta, i kumsa nsina elis. Pursoris di lei ku fariseus tisi un minjer ku pañadu na kai cai. E pul na metadi, e fala Jesus: "Mestre, e minjer pañadu na kai cai. Moises mandanu na lei pa e koldadi minjer matadu ku pedra. Abo gora ke ku bu fala?" E na falaba e kusa pa spurmenta Jesus, pa e pudi tenba manera di akusal. Ma Jesus mpina, i na skirbi na con ku dedu. Suma e ntema na punta, i lanta, i firma, i fala elis: "Na bos li, kin ku nunka ka peka i ta sedu purmeru ku na fercal ku pedra." I torna mpina, i na skirbi na con. Oca e obi ki palabra, kada kin bai si kamiñu, desdi mas beju te nobu. Jesus fika el son ku ki minjer. I lanta, i firma, i ka ojaningn si dianti fora di minjer. I puntal: "Minjer, nunde kilis ku akusau? Ningin ka kondenau?" Minjer falal: "Ningin, Siñor." Jesus falal: "Nin ami N kana kondenau. Bai, ka bu torna peka mas." (Jon 8:2-11)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Lukas 6:37; Jon 8:14-18; 1 Korintius 4:3-5; Tiagu 4:12)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Deus i juis fiel. Omi ka pudi julga ku fidelidadi.

PIDI, BUSKA, BATI PORTA

LISON
2-13

Deus Ta Ruspundi Orason Di Fe



Tema di Lison - Purpara Terenu

Jesus nsina kuma si no pidi, no buska, i no bati porta ku fe, El i ta ruspundi no orason. Pabia di kumuñon ku no tene ku Deus, no pudi pidi Deus sempri. Utru ora, no orason ka ta ruspundidu na mesmu ora.

Versikulu di Distaki: "Bo pidi, bo ta dadu; bo buska, bo ta oca; bo bati porta, i ta yabridu pa bos. Kil ku pidi i ta risibi; kil ku buska i ta oca; kil ku bati porta, i ta yabridu el. (Mateus 7:7-8)



STORIA BIBLIKU - Sumia Simentera

Intruduson tene informason pa judau ntindi storia

Jesus da si disipulus un komparason pa mostra elis kuma e dibi di ora sempri, e dibi di ora sin para.

Storia Bibliku kumsa li.

I fala: "I tenba na un prasa un juis ku ka medi Deus, i ka mporta ku ningin. Na ki mesmu prasa i staba tamba un viuva ku ta baiba sempri nunde juis, i ta falal: 'Fasin justisa kontra fña inimigu.' Manga di dia omi ka kudil. Ma dipus, i fala na si sintidu: 'Nin ku N ka medi Deus, nin N ka mporta ku ningin, ma suma ku e viuva na šatian kada dia, N na fasil justisa, pa ka i torna riba pa kansan.'" Siñor punta elis: "Bo obi ke ku ki juis mau fala? N ta Deus tamba kana fasi justisa pa kilis ki kuji, ku na comal di dia ku di noti? O i na tarda pa kudi elis? N fala bos kuma i na fasi elis justisa dipresa. Ma ora ku Fiju di omi bin, i na oca fe na tera me?" (Lukas 18:2-8)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Efésius 6:18; Kolosensis 4:12; Hebreus 4:16; Tiagu 4:2-3; Tiagu 5:16; 1 Jon 3:21-22; 1 Jon 5:14-15)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus nsinanu kuma no dibi di ora sempri; pa no ora sin kansa. Si no ora ku fe, Deus ta obi no fala, I ta ruspundi no orason.



PAREDIS

VIDA KU TA PADI FRUTA

Ladron ta bin son furta, i mata, i dana. Ami N bin pa jinti tene vida, pa e tenel manga del. (Jon 10:10)

Indisi

- 3-1 Adora Na Tudu Lugar.....Pažina 48**
Deus Misti Un Adorason Di Bardadi
- 3-2 Sigi Kristu.....Pažina 49**
Pa Sigi Kristu i Pirsis Pa No Fia i No Pera Nel.
- 3-3 Sigi Kristu.....Pažina 50**
Kilis Ku Ta Sigi Kristu Ta N gaña Utrus
- 3-4 Konta Utrus Aserka Di Jesus.....Pažina 51**
Leba Utru Jintis pa e Sigi Jesus
- 3-5 Konta Utrus Aserka Di Jesus.....Pažina 52**
Konta Bon Noba pa Utru Jinti
- 3-6 Konta Utrus Aserka Di Jesus.....Pažina 53**
Manga Di Jinti Sta Pruntu Pa Obi Bon Noba
- 3-7 Ama Deus.....Pažina 54**
Kusa Mas Importanti I no Kumuñon Ku Deus
- 3-8 Ama Deus.....Pažina 55**
Kunsi Bon Pastor
- 3-9 Ama Utrus.....Pažina 56**
Vivi na Union Ku Utru Sigiduris di Kristu
- 3-10 Ama Utrus.....Pažina 57**
Sedu Lus pa Mundu
- 3-11 Fasi Disipulus.....Pažina 58**
Da Ña Karnel di Kume
- 3-12 Fasi Disipulus.....Pažina 59**
Jesus Ta Sta Ku Nos Si No Na Fasi Disipulus
- 3-13 Fasi Disipulus.....Pažina 60**
Fortifika i N koraza Krentis

ADORA NA TUDU LUGAR

Deus Misti Un Adorason Di Bardadi



Tema di Lison - Purpara Terenu

Deus ka ta kontenti ku orason ku fasidu kontra-vontadi. Deus ka ta kontenti ora ku no na fasi kualker kusa, no fala no na adoral. Deus ta jubi ciu atitudi di no korson. Deus purmiti kuma un dia jinti, na tudu lugar, na tene un atitudi di adorason na se korson.

Versikulu di Distaki: Di lugar mas lunju di mundu no obi jinti ku na kanta: "Gloria pa Deus justu!" (Isaias 24:16)



STORIA BIBLIKU - Sumia Simentera

Intruduson tene informason pa judau ntindi storia

Pobu di Israel lebaduba pa katiberasku na un tera lunju di se tera natal. Dipus ke pasa manga di anu na katiberasku na kil tera lunju, un rei libertaba elis pa e riba pa se tera natal i pa e kumpu un lugar di adorason. Na lugar nunde ku pobu di Israel ta adoraba nel, e ta sakrifikaba limarias pa Deus, e ta kemalba na un altar. Pobu di Israel riba pa se tera ma e teneba manga di difikuldadi pa kumpu se tera utru bias. Ora ku pobu na fasiba forsa pa kumpu un lugar pa adora Deus, e ta paraduba pabia di garandi difikuldadi prinsipalmenti pabia di diñeru. E kusa kontisi pa manga di anu tok pobu di Deus diskisi importansia di kumpu un lugar di adorason. E kumsa na mporta mas pa kumpu se kasas propi. Deus sta na papia ku Si pobu, i na pidi elis pa e riba pa adorason puru.

Storia Bibliku kumsa li.

Ora ku bo tisi limaria segu pa sakrifika ku el, kila i ka mal? O si bo pурсenta limaria manku o duenti, kila i ka mal? Bai pурсental pa bu gubernadur! Anta i na kontenti ku bo? I na setau? Asin ku Siñor ku ten tudu puder punta. Bo bai pidi Deus fabur pa i pidi ten pena di nos. Ma ku ki koldadi oferta na bo mon, i na seta bos me? Siñor ku ten tudu puder: "I ta bon ba pa un algin na bo metadi fica portas di templu pa tuji bos peganda fugu na ña altar amonton! N ka sta kontenti ku bos, nin N ka na seta oferta di bo mon. Ña nomi na sedu garandi na metadi di nasons desdi saida di sol te na si kaida; na tudu lugar nsensu ku oferta puru na pурсentadu na ña nomi pabia ami na sedu garandi na metadi di nasons." Asin ku Siñor ku ten tudu puder fala. "Ma abos, bo ta kontamina ña nomi ora ku bo fala: 'Mesa di Siñor i impuru.' Ki kumida di oferta ku sta nel, bo ta fala kuma i son pa njutidu! Bo ta fala tambí: 'E kansera!' Bo ta yalsa naris ku dispresu. Bo ta pурсenta limaria ku furtadu, o manku o duenti; asin ku bo ta da oferta. N ta ami na setal na bo mon?" Asin ku Siñor ku ten tudu puder punta. "Pa i sedu maldisuadu ki nganadur ku tene un bon karnel na si koral, i fala i na dal pa Siñor, ma i bai pурсenta un kusa ku tene difeitu. Pabia ami i garandi Rei; ña nomi i meduñu na metadi di nasons." Asin ku Siñor ku ten tudu puder fala. (Malakias 1:8-14)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Isaias 24:16; Isaias 25:3; Jon 4:23-24)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus misti un adorason di bardadi. Deus purmiti kuma un dia jintis na adoral na tudu lugar ku spiritu di adorason.

SIGI KRISTU

Pa Sigi Kristu i Pirsis Pa No Fia i No Pera Nel.



Tema di Lison - Purpara Terenu

Pa sigi Kristu i signifika pa no pui tudu no fiansa na El. Kualker kusa ku no tene na no vida ku no fia ciu na el, i pui tujinu fia kompletamenti na Kristu.

Versikulu di Distaki: Jesus fala si disipulus: "Si algin misti bin ku mi, i ten ku nega si kabesa, i lambu si krus, i sigin. Kin ku misti salba si vida, i na pirdil, ma kin ku pirdi si vida pa amor di mi, i ta ojal. (Mateus 16:24-25)



STORIA BIBLIKU - Sumia Simentera

Intruduson tene informason pa judau ntindi storia

Rikesa i un di kusas ku jinti mas ta pui se fiansa nel. Ne storia, e joven ku bimba pertu Jesus, i seduba un joven riku.

Storia Bibliku kumsa li.

Un joven bin pa jesus, i puntal: "mestri, kal kusa bon ku N na fasi pa ngaña vida ku ka ta kaba?" Jesus puntal: "Pabia di ke ku bu na punta di un kusa bon? Un son ki bon. Si bu misti yentra na vida, bu ten ku obdisi mandamentus." I puntal: "Kal mandamentus?" Jesus falal: "Kabu mata ningin; ka bu kai cai; ka bu furta; ka bu lantanda falsu tustumuñu; rispita bu pape ku bu mane; ama bu kumpañer suma bo propi." Joven falal: "tudu e kusa N obdisil. Ke ku faltan inda?" Jesus falal: "Si bu misti sedu pifitu, bai, bindi tudu kil ku bu tene, bu da pobris. Bu ta ten rikesa na seu. Dipus bu ta bu sigin." Joven kaba di obi e palabra, i bai tristi, pabia i teneba manga di rikesa (Mateus 19:16-22)



PROESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Ditus 3:5-6; Mateus 6:19-21; Romanus15:13; 1 Tesalonisensis 1:3)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Sigiduris di Kristu dibi di pui se fiansa so na Jesus Kristu.

SIGI KRISTU

Kilis Ku Ta Sigi Kristu Ta N gaña Utrus



Tema di Lison - Purpara Terenu

Jesus bin buska i salba kilis ku pirdi. Pa sedu Krenti, i signifika kuma no na ngaña kilis ku pirdi suma ku Jesus fasi.

Versikulu di Distaki: Jesus fala si disipulus: “Si algin misti bin ku mi, i ten ku nega si kabesa, i lambu si krus, i sigin. Kin ku misti salba si vida, i na pirdil, ma kin ku pirdi si vida pa amor di mi, i ta ojal. (Mateus 16:24-25)



STORIA BIBLIKU - Sumia Simentera

Intruduson tene informason pa judau ntindi storia

Jesus na nsinaba palabra di Deus na diferenti tabankas. Manga di jinti ta binba pa sukuta ke ku Jesus na nsina.

Storia Bibliku kumsa li.

Jesus torna bai praia. Manga di jinti bai lungu del; i kumsa na nsina elis. I bai mas danti, i oja Levi, fiju di Alfeu, sintadu na si kau di kobra mpustu. I falal: “Bin no bai.” I lanta i bai ku el. Oca Jesus ku si disipulus sintaba na mesa na kasa di Levi, manga di kobradur di mpustu ku utru jinti di mau nomi sinta juntu ku elis. Jintis ku na sigil e baiba ciu. Utrus pursoris di lei di grupu ku comadu fariseu oja Jesus na kume juntu ku ki jinti; e punta si disipulus: “Ke ku manda i na kume ku kobraduris di mpustu ku jinti di mau nomi?” Jesus obi ki kusa, i fala elis: “Kilis ku san e ka pirsisa di mediku, son kil ku duensi. Ami N ka bin pa coma jinti justu, ma N bin coma kilis ku ta fasi pekadu.” (Markus 2:13-17)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Ditus 19:17; Lukas 15:1-31; Lukas 19:10; Gálatas 6:9-10, Tiagu 3:18)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Suma sigiduris di Kristu, no na ngaña kilis ku pirdi, ku sta na no roda, suma ku Jesus ngaña kilis ku pirdi ku staba na Si roda.

KONTA UTRUS ASERKA DI JESUS

LISON
3-4

Leba Utru Jintis pa Sigi Jesus



Tema di Lison - Purpara Terenu

Deus misti tene kumuñon ku tudu jinti. Suma sigiduris di Kristu, no comadu pa leba utru jintis pa e tene tambi kumuñon ku Deus.

Versikulu di Distaki: Kuma ke na coma kil ke ka fia nel? Kuma ke na fia na kin ke ka obi faladu del? Kuma ke na obi si i ka ten kin ku na konta? Kuma ke na konta si e ka mandadu? Suma ki sta skritu: "Bonitu i pes di kilis ku ta konta Bon Noba!" (Romanus 10:14-15)



STORIA BIBLIKU - Sumia Simentera

Intruduson tene informason pa judau ntindi storia

Simon Pedru seduba un bon piskadur antis di kumsa sigi Kristu. Na e storia, Jesus coma Pedru pa i sedu piskadur di omi.

Storia Bibliku kumsa li.

Un dia Jesus sikidu lungu di lagua di Jenesaré. Multidon na kalkalba pa obi palabra di Deus. I oja dus barku nkajadu na praia, ku piskaduris kumsa ria nel, e na lababa ridias. I kamba na un delis ku sedu kil di Simon, i pidil pa i lunjisi un bokadu di praia. I sinta na barku, i kontinua na nsina multidon. Oca ki kaba papia, i fala Simon: "Bo bai pa kau fundu, bo bota ridia pa piska." Simon ruspundil: "Mestri, no tarbaja ciu noiti ntidu, no ka paña nada. Ma suma ku bu fala asin, N na bota ridia." E bota, e paña manga di pis, tok ridia misti rumpi. E sana se Kumpañeris ku staba na utru barku pa e bin juda elis. E bai, e inci tudu dus barku, tok i falta pikininu pa e foga. Oca Simon Pedru oja ke ku kontisi, i mborka dianti di Jesus, i falal: "Siñor, lunjisi di mi, pabia ami i un omi di pekadu!" El ku tudu ku staba ku el fika spantadu pabia di manga di pis ke paña, suma tambi Tiagu ku Jon fiju di Zebedeu ku seduba sos di Simon. Jesus fala Simon: "Ka bu medi, di aos pa dianti bu na sedu piskadur di omi." E leba barkus, e nkajanta elis na praia; e disa tudu; e sigi Jesus. (Lukas 5:1-11)



PROESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 28:18-19; Jon 4:39-42; 2 Pedru 3:9)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Deus misti tene kumuñon ku tudu jinti. Suma sigiduris di Kristu, no tene obrigason di fasi utru jintis pa e tene kumuñon ku Deus.

ASERKA DI JESUS

Konta Bon Noba pa Utru Jinti



Tema di Lison - Purpara Terenu

Biblia fala pa konta Bon Noba di Jesus pa utrus. Tudu jinti mersi obi aserka di Bon Noba ku Jesus bin konta.

Versikulu di Distaki: Kuma ke na coma kil ke ka fia nel? Kuma ke na fia na kin ke ka obi faladu del? Kuma ke na obi si i ka ten kin ku na konta? Kuma ke na konta si e ka mandadu? Suma ki sta skritu: "Bonitu i pes di kilis ku ta konta Bon Noba!" (Romanus 10:14-15)



STORIA BIBLIKU - Sumia Simentera

Intruduson tene informason pa judau ntindi storia

Paulu seduba un pursor i pregadur ku kunsiduba dimas. Ne storia, Paulu na pregaba ivanželiu. Ivanželiu i Bon Noba kuma Deus misti tene kumuñon ku tudu jinti. No pudi tene kumuñon ku Deus pabia di sakrifisiu di Jesus pa no pekadu.

Storia Bibliku kumsa li.

Na ki di noti Paulu oja un vison. Un omi di Masedônia staba sikidu si dianti, ku pidil i falal: "Bin pa Masedônia, bu judanu." Oca ki tene e vison, logo no buska pasažen pa bai Masedônia. No oca kuma Siñorcomanu pa no konta elis Bon Noba. No mbarka na Troas, no bai diritu pa Samotrásia. Sol mansi, no ciga Neápolis. Di la no bai pa Fílipus, prasa mas importanti na ki parti di Masedônia; i un kolonia di Roma. No fika la puku dia. Na dia di diskansu no sai na porton di prasa pa roda di riu, nunde ku no kuda kuma i pudi ten un lugar di orason. No sinta, no na papiaba ku minjeris ku junta la. Un minjer ku comadu Lidia, di prasa di Tiatira, bindidur di fasenda purpura, ku ta adoraba Deus, i na sukutanuba. Siñor yabril korson pa i pui sintidu na kil ku Paulu na fala. Oca ki batisadu, tudu ku si familia, i pidinu, i fala: "Si bo oca kuma ami i krenti fiel na Siñor, bo ta bai fika na ña kasa." Asin ki ngodanu; no bai. (Atus 16:9-15)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 10:7-8; Mateus 28:19-20; Markus 16:15; Romanus 1:16-17; 1 Korintius 2:1-5)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Biblia fala, sigiduris di Jesus, e comadu pa konta utrus aserka di Bon Noba; asin, pa tudu jintis pudi tene kumuñon ku Deus.

ASERKA DI JESUS

Manga Di Jinti Sta Pruntu Pa Obi Bon Noba



Tema di Lison - Purpara Terenu

Jesus fala kuma kebur garandi ma kebraduris puku. I ten manga di jintis ku na pera pa obi aserka di Jesus Kristu. Sigiduris di Jesus Kristu dibi di konta Bon Noba pa tudu jinti.

Versikulu di Distaki: Kuma ke na coma kil ke ka fia nel? Kuma ke na fia na kin ke ka obi faladu del? Kuma ke na obi si i ka ten kin ku na konta? Kuma ke na konta si e ka mandadu? Suma ki sta skritu: "Bonitu i pes di kilis ku ta konta Bon Noba!" (Romanus 10:14-15)



STORIA BIBLIKU - Sumia Simentera

Intruduson tene informason pa judau ntindi storia

Jesus nsina Si disipulus kuma ku e pudi konta Bon Noba.

Storia Bibliku kumsa li.

Dipus, Siñor kuji mas setenta disipulu, i manda elis dus dus pa e bai dianti pa tudu prasa ku lugaris nunde ki tenba ku bai. I fala elis: "Bardadi, kebur i garandi, ma tarbajaduris puku. Bo pidi Siñor, ki Dunu di kebur, pa i manda tarbajaduris pa si kebur. Bo bai; N na manda bos suma fiju di karnel na metadi di lubu. Ka bo leba kartera, nin saku, nin sandalia, nin ka bo para pa fala manteña na kamiñu. "Na kada kasa ku bo yentra, bo fala purmeru: 'N dija pas pa e kasa.' Si i sta la un algin di pas, bo manteña di pas ta fika riba del, ma si i ka sta, i ta riba pa bos. Bo fika na ki mesmu kasa, bo kume, bo bibi kil ke tene, pabia tarbajadur mersi si pagu. Ka bo munda pa kada kasa. Si bo yentra na un prasa ke risibi bos, bo kume kil ke pui bo dianti. Bo kura duentis ku sta la, bo fala elis: 'Renu di Deus ciga pertu di bos.' (Lukas 10:1-9)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Isaias 6:8; Mateus 9:35-38; Jon 4:35-38; Gálatas 6:9-10)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

No dadu ordi pa konta Bon Noba di Ivanželiu. No tene obrigason pa konta Bon Noba pa jinti ku sta na no roda.

AMA DEUS

Kusa Mas Importanti I no Kumuñon Ku Deus



Tema di Lison - Purpara Terenu

Jesus pidi Si disipulus pa e fasi manga di kusas; ma kusa mas importanti di tudu, i no Kumuñon ku Deus.

Versikulu di Distaki: Ama Siñor bu Deus ku tudu bu korson, ku tudu bu alma, ku tudu bu ntindimentu, ku tudu bu forsa. (Markus 12:30)



STORIA BIBLIKU - Sumia Simentera

Intruduson tene informason pa judau ntindi storia

Maria ku Marta e seduba sigiduris di Jesus, e teneba bon Kumuñon ku El.

Storia Bibliku kumsa li.

Jesus ku si disipulus e kontinua se kamiñu. I yentra na un tabanka; un minjer ku comadu Marta risibil na si kasa. I teneba un irma ku comadu Maria, ku bin sinta na pe di Jesus pa obi si palabra. Marta staba tarpajadu ku manga di tarbaju. I bai pa Jesus, i falal: “ Siñor, bu ka oja kuma ña irma disan ami son ku tarbaju? Falal pa i bin judan.” Jesus ruspundi i falal: “Marta, Marta, bu sta fadigadu, tarpajadu ku manga di kusa, ma un kusa son ki pirsis. Maria kuji kil ki mas minjor; i ka na tiradu el.” (Lukas 10:38-42)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 11:28-30; Jon 14:15; Lukas 6:47-49; Filipensis 2:12-13)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Mandamentu mas garandi ku Jesus da i kuma no dibi di amal ku tudu no korson, alma, ntindimentu, ku forsa.

AMA DEUS

Kunsi Bon Pastor

LISON
3-8



Tema di Lison - Purpara Terenu

Sigiduris di Kristu dibi di ama Deus ku tudu parti di se kurpu. Pa ama Deus ku tudu kil ku no sedu, no dibi di kunsil purmeru.

Versikulu di Distaki: Ama Siñor bu Deus ku tudu bu korson, ku tudu bu alma, ku tudu bu ntindimentu, ku tudu bu forsa. (Markus 12:30)



STORIA BIBLIKU - Sumia Simentera

Intruduson tene informason pa judau ntindi storia

Jesus splikaba ja kuma Si sigiduris sedu suma karnel; karnel ta sigi si Pastor.

Storia Bibliku kumsa li.

Jesus torna fala elis: "Na bardadi, N na konta bos kuma ami ki porta di koral di karnel. Tudus kilis ku bin antis di mi i ladron, i bandidu, ma karnel ka kudi elis. Ami i porta; kin ku yentra na mi i na salba, i na parsi suma karnel kuna yentra, i na sai, i na oca paja pa kume. Ladron ta bin son furta, i mata, i dana. Ami N bin pa jinti tene vida, pa e tenel mangadel. Ami i bon pastor; bon pastor ta sta pruntu pa muri pa si karnel. Ma mpregadu, kil ki ka bakiadur, karnel i ka di sil, si lubu na bin i ta kuri i fika karnel; lubu ta rabata karnel, i ta pajiga elis. Mpregadu ta kuri pabia el i mpregadu son, i ka ta mporta ku karnel. Ami i bon pastor. Suma ku ña Pape kunsin, ami tamba N kunsin ña Pape. Asin ku N kunsin ña karnel, elis e kunsin; N sta pruntu pa muri pa elis. (Jon 10:7-15)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Salmus 23; Salmus 100; Mateus 9:35-36)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Si no kunsi Deus, no na amal.

Ama Utrus

Vivi na Union Ku Utru Sigiduris di Kristu



Tema di Lison - Purpara Terenu

Sigiduris di Kristu ta comadu Igreža. Deus na pera pa Igreža vivi na union.

Versikulu di Distaki: 'Ama bu Kumpaņier suma bo propi.' (Markus 12:31)



STORIA BIBLIKU - Sumia Simentera

Intruduson tene informason pa judau ntindi storia

Ŝefis riližiosu ku staba kontra Jesus fala Ŝefis di Igreža pa ka e nsina aserka di Jesus. Igreža ta oraba, e ta pidiba Deus pa i difindi elis.

Storia Bibliku kumsa li.

Agora Siņor, obi kuma ke na njata; juda bu servus pa e fala bu palabra ku tudu koražen; bu distindi bu mon pa kura, pa sinal ku milagri pudi fasidu na nomi di bu santu servu Jesus." Dipus ke ora, lugar ke juntaba nel tirmi. Elis tudu e incidu ku Spiritu Santu, e kumsa na konta palabra di Deus ku koražen. Ki manga di krenti teneba un pensamentu ku un korson. Ningin ka ta falaba: "E kusa li i di mi." Ma tudu se kusas, e ta rapatil ku N utru. Apostolus na testifikaba ku garandi puder di manera ku Siņor Jesus lanta di mortu. Garandi fabur di Deus staba riba delis tudu. I ka tenba nin un koitadi na se metadi, pabia tudu kilis ku tene terenu o kasas, e ta bindil, e ta tisiba ki diferu ke oca, e ditandal dianti di apostolus. E ta rapati konformi kada kin ten falta. (Atus 4:29-35)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Romanus 12:3-21; 1 Korintius 12:12-31; 1 Korintius 14:26; Efésius 4:1-16)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

No comadu pa vivi na union ku utru sigiduris di Kristu.

AMA UTRUS

Sedu Lus pa Mundu



Tema di Lison - Purpara Terenu

Jesus nsina Si disipulus pa e ama se kumpaŋer. Krentis comadu pa leba mensagen di pas pa mundu. Krentis comadu pa mostra utru jinti amor di Deus.



STORIA BIBLIKU - Sumia Simentera

Intruduson tene informason pa judau ntindi storia

Biblia nsinanu pa no ama no Kumpaŋer. Un pursor di lei punta Jesus kin ki si Kumpaŋer. Jesus ruspundi ku un komparason aserka di un saserdoti, un omi di jorson di Levi, ku un Samaritanu. Omi di jorson di Levi ku saserdotis seduba jintis ku ta dedika ciu na riližion. Samaritanus i jintis ku ka ta filaba ku Judeus, grupu ku Jesus pertensiba.

Storia Bibliku kumsa li.

Jesus ruspundi i falal: "I tenba un omi ku sai di Jerusalen pa bai Jerikó, i kontra ku ladrons. E pañal, e dispil, e sutal, e bai, e disal kuas mortu. Na ki mesmu kamiñu i bin na pasa un saserdoti. I oja ki omi, i pasa di largu. Na ki mesmu manera tambi un omi di jorson di Levi ciga na ki lugar, i ojal, i pasa di largu. Ma un omi di Samaria ku na bai bias ciga pertu del, i ojal, i sinti pena del, i bai pa el, i untal molostus ku azeiti ku biñu, i pul ligadura, i montal riba di si buru, i lebal pa un penson, i toma konta del. Oca ku sol mansi, i tira dus mueda di prata, i da dunu di penson, i falal: 'Toma konta del.' Tudu ku bu gasta di mas, ora ku N riba N na pagau el.' Ke bu oca? Kal de tris jinti ku sedu Kumpaŋer di ki omi ku kai na mon di ladrons?" I ruspundi: "Kil ku mostral bondadi." Jesus falal: "Bai, bu fasi suma ku el i fasi." (Lukas 10:30-37)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 5:14-16; Jon 13:34-35; 1 Korintius 13; Efésius 4:1-3; 1 Jon 3:16-18; 1 Jon 4:7-12)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

No ta mostra amor di Deus ora ku no kuida di kilis ku ka tene. No ta mostra no amor pa Deus si no kuida di utru jinti.

FASI DISIPULUS

Da Ña Karnel di Kume



Tema di Lison - Purpara Terenu

Amor di Deus ta motivanu pa trena i pa kuida di utru krentis.

Versikulu di Distaki: N na pidi bos pa bo toma konta di krentis na bo metadi, ku sedu karnel di Deus. I ka obrigason, ma di bo libri vontadi, suma ku Deus misti; i ka ku spiritu intereseru, ma ku disežu di sirbi. (1 Pedru 5:2)



STORIA BIBLIKU - Sumia Simentera

Intruduson tene informason pa judau ntindi storia

Jesus krusifikaduba ja ma I lanta di mortu. Un dia parmaña sedu, Jesus oja Si disipulus na piska.

Storia Bibliku kumsa li.

Jesus fala elis: “Bo bin kume.” Nin un di ki disipulus ka osaba puntal el i kin. E sibiba kuma i Siñor. Jesus ciga, i toma pon, i da elis; i fasi mesmu kusa ku pis. Es ki terseru bias ku Jesus parsi danti di disipulus dipus di lanta di mortu. Oca e kaba kume, Jesus punta Simon Pedru: “Simon, fiju di Jon bu aman mas di ki esis?” I ruspundil: “Sin Siñor, bu sibi kuma N amau.” Jesus falal: “Bakia ña karnelsiñus.” Jesus torna puntal sugundu bias: “Simon fiju di Jon, bu aman?” I falal: Sin Siñor bu sibi kuma N amau. I falal: “Bakia ña karnel.” Jesus punta terseru bias: “Simon, fiju di Jon bu aman?” Simon fika tristi manera ku Jesus puntal tris bias si amal. I ruspundil: “Siñor, bu sibi tudu; bu sibi kuma N amau.” Jesus falal: “Bakia ña karnel. (Jon 21:12-17)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 28:19-20; Atus 20:28; 1 Korintius 9:16-18; 1 Tesalonisensis 5:11; 2 Timótiu 2:2; 2 Timótiu 4:2-5)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus fala Si sigiduris pa e fasi disipulus. Fasi disipulus signifika pa juda i pa trena utru krentis pa e pudi kirsi na se kumuñon ku Deus.

FASI DISIPULUS

Jesus Ta Sta Ku Nos Si No Na Fasi Disipulus



Tema di Lison - Purpara Terenu

Jesus ama jinti di mas, asin, I pidi Si sigiduris pa e fasi disipulus. Jesus purmiti krentis kuma I na sta ku elis na e tarbaju di fasi disipulus.

Versikulu di Distaki: N na pidi bos pa bo toma konta di krentis na bo metadi, ku sedu karnel di Deus. I ka obrigason, ma di bo libri vontadi, suma ku Deus misti; i ka ku spiritu intereseru, ma ku disežu di sirbi. (1 Pedru 5:2)



STORIA BIBLIKU - Sumia Simentera

Intruduson tene informason pa judau ntindi storia

Jesus krisifikadu, I pudu na koba pa tris dia. Si disipulus sibi kuma kil koba ku Jesus nteraduba nel, ningin ka staba ja la.

Storia Bibliku kumsa li.

Si onzi disipulus bai pa Galilea, pa monti ku Jesus mostraba elis. Oca ke ojal, e adoral, ma utrus tenba duvida. Jesus ciga pertu, i fala elis: "N dadu tudu puder na seu ku na tera. Asin, bo bai pa jinti di tudu nasons, bo fasi elis ña disipulus. Bo batisa elis na nomi di Pape, di Fiju ku Spiritu Santu. Bo nsina elis pa e obdisi tudu kusas ku N manda bos. Ami na sta ku bos tudu dia te na kabantada di tempu." (Mateus 28:16-20)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Jon 14:15-17; Atus 2:42-47; 2 Timótiu 2:2; Hebreus 13:5-6)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus nsina Si disipulus pa e bai e fasi disipulus. Sigiduris di Kristu comadu pa nsina nobu krentis pa e pudi kirsi na kunsimentu i na fe na Kristu.

FASI DISIPULUS

Fortifika i N koraža Krentis



Tema di Lison - Purpara Terenu

Suma krentis, anos tudu no dibi di nkoražadu i fortifikadu na no fe. Suma membru di familia di Deus, no dibi di nsina i no nkoraža N utru.

Versikulu di Distaki: N na pidi bos pa bo toma konta di krentis na bo metadi, ku sedu karnel di Deus. I ka obrigason, ma di bo libri vontadi, suma ku Deus misti; i ka ku spiritu intereseru, ma ku disežu di sirbi. (1 Pedru 5:2)



STORIA BIBLIKU - Sumia Simentera

Intruduson tene informason pa judau ntindi storia

Paulu ku Barnabé ta yendaba di prasa pa prasa e na konta Bon Noba di Jesus.

Storia Bibliku kumsa li.

Ma oca ku krentis dal volta, i lanta, i yentra na prasa. Sol mansi, i bai ku Barnabé pa Derbi. Dipus di e konta Bon Noba na ki prasa, e ngaña manga di nobo krenti, e riba pa Listra, Ikóniu ku Antiokia di pisídia, e fortifika krentis, e konsija elis pa e kontinua firmi na fe, e fala elis kuma, pa no yentra na renu di Deus, i pirsis pasa manga di sufrimentu. Tambi na kada Igreža e kuji garandis; e ora, e junjuna, e ntrega elis na Siñor ke fia nel. (Atus 14:20-23)



PROESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Atus 2:42-47; Atus 11:25-30; Atus 15:30-41; Atus 18:23; 1 Tesalonisensis 5:13-15)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Pa no sedu sigiduris di Kristu fiel, no pirsisa di fortifika i di nkoraža N utru.



KANKRA

BARDADIS IMPORTANTI

“Bo ta kungsi bardadi; bardadi ta liberta bos.” (Jon 8:32)

Indisi

Lisons:

| | |
|--|------------------|
| 4-1 Deus | Pažina 62 |
| <i>I Ten So Un Uniku Deus</i> | |
| 4-2 Jesus | Pažina 63 |
| <i>Jesus I Fiju Di Deus</i> | |
| 4-3 Spiritu Santu | Pažina 64 |
| <i>Sigiduris Di Kristu Pirsisa di Spiritu Santu</i> | |
| 4-4 Amor ku Purdon | Pažina 65 |
| <i>Jesus Bin Mostra Amor ku Purdon</i> | |
| 4-5 Justifikadu Pa Deus | Pažina 66 |
| <i>Seta Kuma No Ka Sedu Justu Suma Deus</i> | |
| 4-6 Renu Di Deus | Pažina 67 |
| <i>Padidu Utru Bias Spiritualmenti</i> | |
| 4-7 Biblia | Pažina 68 |
| <i>Bardadi Ku Deus Skirbi</i> | |
| 4-8 Igreža | Pažina 69 |
| <i>Sigiduris di Kristu Dibi Di Vivi na Unidadi</i> | |
| 4-9 Lus Di Mundu | Pažina 70 |
| <i>Mostra Lus Di Kristu</i> | |
| 4-10 Iternidadi | Pažina 71 |
| <i>Pa Sempri ku Deus o Pa Sempri na Sufrimentu</i> | |
| 4-11 Juis | Pažina 72 |
| <i>Jesus Kristu Na Julga Tudu Jinti</i> | |
| 4-12 Sia Di Siñor | Pažina 73 |
| <i>Importansia Di Lembra Mortu Di Kristu Pa No Pekadus</i> | |
| 4-13 Batismu | Pažina 74 |
| <i>Fasi Un Diklarason Publiku di Fe na Kristu</i> | |

I Ten So Un Uniku Deus



Tema di Lison - Purpara Terenu

I ten so un uniku Deus. Biblia ta judanu ntindi kin ki Deus i kuma ki sta. Biblia kontanu kuma Krentis ta adora so un uniku Deus; adora utrus deus i disobdiensia pa uniku Deus di bardadi.

Versikulu di Distaki: Siñor no Deus, i el son ki Siñor. (Markus 12:29)



STORIA BIBLIKU - Sumia Simentera

Intruduson tene informason pa judau ntindi storia

Paulu i un di purmeru garandi pregadur di Palabra di Deus. Un dia Paulu na pregaba palabra di Deus pa konta jinti aserka di un uniku Deus. Jinti di sidadi juntaba na roda di Paulu pa sukuta ke ki na fala.

Storia Bibliku kumsa li.

Paulu firma na metadi di jinti na Areópagu, i fala: "Omis di Atenas, N oja kuma di tudu manera bo sedu riližiosu dimas. Oca N na pasa, N na jubi kusas ku bo ta adora, N oja la tambi un altar ku sta skritu nel: 'PA DEUS KU KA KUNSIDU'. Es ku bo da rispitu sin bo ka kunsil, el ku N misti konta bos. Deus ku kumpu mundu ku tudu ku sta nel, ku sedu Siñor di seu ku tera, i ka ta mora na kasas ku mon di omi fasi pa el. Mon di omi tambi i ka ta sirbil, suma kin ku misti algun kusa, pabia el propi i ta da tudu jinti vida ku folgu ku tudu kusa. I kumpu un omi ku tudu rasas bin sai nel, pa e mora na tudu parti di mundu. I jumna marka elis tempu ku lugar nunde ke na mora. I fasi asin pa e pudi buskal. Talves e pudi ocal si e palpa-palpa. Kontudu i ka sta lunju di kada un di nos, pabia nel ku no na vivi, no na bulbuli; nel tambi ku no sedu. I suma ku utru di bo puetas fala: 'No sedu tambi si fijus. Asin, suma no sedu fijus di Deus, no ka dibi di kuda kuma no pudi parsintil ku imažen di uru o di prata o di pedra, fasidu ku jitu na manera ku omi kuda. Na ki tempu ku pasa, Deus fica uju pa se falta di kunsimentu, ma gosi i da ordi pa tudu omis na tudu lugar pa e ripindi. Pabia i marka un dia ki na bin julga mundu ku justisa, na mon di un omi ki distina pa i fasil. I da tudu jinti sertesa di kuma i na sedu, oca i lantanda ki omi na metadi di mortus.'" (Atus 17:22-31)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Kumsada 1:1; Lei 6:4-5; Markus 12:32; 1 Timótio 2:5-6; Apokalipsi 1:8)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

I ten so un uniku Deus di bardadi. No dibi di toma kuidadu pa ka no adora deus falsu.

JESUS

LISON

4-2

Jesus I Fiju Di Deus



Tema di Lison - Purpara Terenu

Jesus staba na seu ku Deus antis di i bin pa tera. Jesus i uniku Fiju di Deus. Dipus di si mortu ku si resureson di mortu, Jesus riba pa Si Pape na seu. Pa no pirsibi i pa no adora Jesus suma ki dibi di sedu, no pirsisa sibi kuma Deus Pape ku Jesus e sedu un son.

Versikulu di Distaki: E kusa tudu i sedu pa pudi fasi kil ku Siñor falaba ja na boka di anunsiadur ku fala asin: "Un bajuda na bin preña, i na padi un fiju macu ku na comadu Emanuel," ku sedu: "Deus sta ku nos." (Mateus 1:22-23)



STORIA BIBLIKU - Sumia Simentera

Intruduson tene informason pa judau ntindi storia

Storia ta konta kuma i tenba manga di omi ku Deus manda pa konta kuma un dia Jesus na bin. Moisés ku Elias e seduba profetas ku vivi manga di anu antis di Jesus bin pa tera.

Storia Bibliku kumsa li.

Dipus di seis dia Jesus coma Pedru, Tiagu ku si ermon Jon, i leba elis aparti pa un monti altu, i torkia si parsensa se dianti. Si rostu na lampraba suma sol, si ropa bida branku suma lus. E oja Moisés ku Elias na papia ku Jesus. Pedru kumsa na papia, i fala Jesus: "Siñor, i bon manera ku no sta li. Si bu misti, N ta fasi tris baraka li, un pa bo, un pa Moisés, un pa Elias." Oca e na papia inda, un nuven ku na lampra bin kubri elis. Vos sai na ki nuven ku fala: "Es i ña fiju ku N kiri ciu. N ten garandi kontentamentu nel. Bo sukutal." Si disipulus obi ki palabra, e panta, e mborka na con. Jesus ciga pertu delis, i panga elis, i fala: "Bo lanta; ka bo panta." E yalsa uju, e ka oja mas ningin, son Jesus. (Mateus 17:1-8)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Jon 1:1-5; Jon 3:16; Filipensis 2:5-11; Kolosensis 1:15-20; Kolosensis 2:9; Hebreus 1:1-3)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus ku Pape ku sta na seu e sedu un son. Jesus i Deus.

SPIRITU SANTU

LISON

4-3

Sigiduris Di Kristu Pirsisa di Spiritu Santu



Tema di Lison - Purpara Terenu

Jesus nsina Si disipulus kuma kumuñon ku Spiritu Santu i importanti. Jesus teneba kumuñon ku Spiritu Santu. Spiritu Santu I ta comadu Judadur, I ta leba sigiduris di Kristu pa e kungsi bardadi. Spiritu Santu tamba ta da sigiduris di Kristu poder. Mesmu aos pa krentis, kumuñon ku Deus i ku Spiritu Santu i importanti inda.

Versikulu di Distaki: Na pidi ña Pape; el i ta da bos utru judadur ku na fika ku bos pa sempri, ku sedu Spiritu di bardadi ku jinti ku ka kungsi Deus ka pudi risibi, pabia e ka ta nota pa el, nin e ka kungsi; ma abos bo kungsi, pabia i mora ku bos; i na sta na bos. (Jon 14:16-17)



STORIA BIBLIKU - Sumia Simentera

Intruduson tene informason pa judau ntindi storia

Un di ultimu kusa ku Jesus fala Si disipulus i pa e pera pa risibi Spiritu Santu. Na obdiensia, un grupu di manga di jinti juntaba na Jerusalem e na pera. Dipus di agun dia, Spiritu Santu ria riba di kil grupu di jinti nunde ke staba juntadu nel.

Storia Bibliku kumsa li.

Oca dia di pentekostis ciga, e staba tudu juntadu na mesmu lugar. Di repenti i bin di seu un baruju suma di bentu forti di turbada; i inci dentru di kasa ke staba sintadu nel. I parsi elis suma lingua di fugu ku rapati, i sinta riba di kada un delis. Tudu fika na ki ora incidu ku Spiritu Santu; e kumsa na fala na utru linguas, suma ku Spiritu da elis puder di fala. Na ki dias i staba na Jerusalem Judeus, omis riližiosu ku bin di tudu nason di mundu. Oca ke obi ki baruju, i junta garandi multidon. E fika tudu kunfundidu, pabia kada kin na obi ki jinti na fala na lingua di si tera. E fika tudu ntrumpidu, e dimira, e punta nutru: "Es i ke? Tudu e jinti ku na papia e ka sedu di Gelileia? Kuma ku kada un di nos na obi elis na lingua ku no padidu nel? Anos di Pártia, di Media, di Elan, di Mesopotamia, di Judeia, di Kapadósia, di Pontu, di Asia, di Frízia, di Panfília, di Ejitu, di reziions di Libia ku fika pertu di Sireni, stranjerus di Roma, Judeus tudu ku kilis ku seta riližion di Judeus, utrus di Kreta, di Arabia, anos tudu no obi elis na no lingua propi e na fala di kusas garandi ku Deus fasi!" Tudu elis e dimira, e ka sibi ke ke na pensa. E na punta nutru: "Es i ke?" Utrus na fasi trosa, e na fala kuma e cami nan! Pedru lanta i firma juntu ku ki utru onzi apostulu, i lantanda si vos, i fala jinti: "Ermons Judeu, ku abos tudu ku mora na Jerusalem, bo pera N splika bos e kusa. Bo sukuta ña palabra. E omis ka cami suma ku bo na pensa; i son novi ora di parmaña. Ma es i kil ku anunsiadur Joel kontaba ja, kuma Deus fala asin: 'Na ultimu tempu N na darma ña Spiritu riba di tudu jinti. Bo fijus macu ku femia na anunsia rekadu di Deus; bo jovens na oja visons; bo omis garandi na bata suña. (Atus 2:1-17)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Lukas 11:13; Jon 16:13; Atus 1:8; 1 Korintius 12:7-11; Gálatas 5:16)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Purmeru sigiduris di Jesus teneba susesu na se tempu pabia e incidu ku Spiritu Santu. Aos tamba, suma kil purmeru sigiduris di Kristu, no pirsisa di Spiritu Santu.

AMOR KU PURDON

Jesus Bin Mostra Amor ku Purdon



Tema di Lison - Purpara Terenu

Jesus mostra amor ku purdon di Deus pa tudu jinti. Suma sigiduris di Kristu, no dibi di mostra tamba amor ku purdon di Deus pa tudu jinti.

Versikulu di Distaki: Es i ña mandamentu: pa bo ama nutru suma ku N ama bos. (Jon 15.12)



STORIA BIBLIKU - Sumia Simentera

Intruduson tene informason pa judau ntindi storia

Oca Jesus na vivi na tera, jintis ta sigiba lei di Moisés. Ne storia, Jesus na mostra jinti nobu manera di vivi ku sta basiadu na amor ku purdon.

Storia Bibliku kumsa li.

Parmaña sedu i riba pa kasa di Deus. Tudu jinti na binba nunde el; i sinta, i kumsa nsina elis. Pursoris di lei ku fariseus tisi un minjer ku pañadu na kai cai. E pul na metadi, e fala Jesus: “Mestre, e minjer pañadu na kai cai. Moisés mandanu na lei pa e koldadi minjer matadu ku pedra. Abo gora ke ku bu fala?” E na falaba e kusa pa spurmenta Jesus, pa e pudi tenba manera di akusal. Ma Jesus mpina, i na skirbi na con ku dedu. Suma e ntema na punta, i lanta, i firma, i fala elis: “Na bos li, kin ku nunca ka peka i ta sedu purmeru ku na fercal ku pedra.” I torna mpina, i na skirbi na con. Oca e obi ki palabra, kada kin bai si kamiñu, desdi mas bežu te nobu. Jesus fika el son ku ki minjer. I lanta, i firma, i ka oja ninguin si dianti fora di minjer. I puntal: “Minjer, nunde kilis ku akusau? Ningin ka kondenau?” Minjer falal: “Ningin, Siñor.” Jesus falal: “Nin ami N kana kondenau. Bai, ka bu torna peka mas.” (Jon 8:2-11)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Jon 15:12-17; 1 Jon 2:8-11; 1 Jon 3:16; 1 Jon 4)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus I isemplu mas pifitu di amor ku purdon. Si no sedu sigiduris di Kristu, no dibi di mostra amor ku purdon pa tudu jinti.

Justifikadu Pa Deus

Seta Kuma No Ka Sedu Justu Suma Deus



Tema di Lison - Purpara Terenu

Ningin ka yangasa naturesa gloriosu di Deus; ningin i ka justu suma Deus. No ka pudi sedu minjor o justifikadu pabia di bon kusas ku no ta fasi. No dibi di seta kuma anos i pekaduris i no pidi Deus purdon. Si no pidi Deus purdon, no ta sedu justifikadu pa Deus.

Versikulu di Distaki: Tudu jinti peka; e ka yangasa naturesa gloriosu di Deus... (Romanus 3.23)



STORIA BIBLIKU - Sumia Simentera

Intruduson tene informason pa judau ntindi storia

Jesus konta storia di dus omi. Un i seduba šef riližiosu ku ta comadu Fariseu. Kil utru omi i kobradur di mpustu. Jinti ta teneba odiu di kobraduris di mpustu. Ne storia, es omi sedu justifikadu pa Deus; i signifika kuma Deus purda si pekadu.

Storia Bibliku kumsa li.

I fala: "Dus omi bai na kasa di Deus pa bai ora. Un i fariseu, utru i kobradur di mpustu. Fariseu firma na un kau, i na oraba ku si kabesa de manera: `O Deus, N ta falau obrigadu, pabia N ka sedu suma utru jinti, ku ta furta, ku ta fasi mal, ku ta kiri minjer di jinti; nin N ka sedu suma e kobradur di mpustu. N ta junjuna dus bias na semana; N ta dau desimu parti di tudu ku N tarisibi." "Ma kobradur sikidu lunju; nin i ka misti yalsa uju pa seu. I na bati na pitu, i na fala: `O Deus, ami N ta yarau; ten pena di mi!" "N na fala bos kuma e kobradur i bai pa si kasa limpu di si pekadu, ma ki utru nau, pabia kil ku yalsa si kabesa i ta bašadu; kil ku baša si kabesa i ta yalsadu." (Lukas 18:10-14)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Romanus 3:24; Romanus 4:4-5; Romanus 4:25; Romanus 5:1-2; Romanus 5:8-10; Romanus 10:10; Tiagu 2:20-26)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Tudu jinti peka e pirsisa sedu justifikadu. Pa sedu justifikadu, i ta kumsa ora ku no seta kuma anos i pekadur, no pirsisa di purdon di Deus. Dipus no ta pidi Deus purdon. Son Deus ku pudi justifikanu.

RENU DI DEUS

Padidu Utru Bias Spiritualmenti



Tema di Lison - Purpara Terenu

Jesus ta papiaba sempri di renu di Deus. Renu di Deus i nunde ku Deus ta rena nel. Sigiduris di Kristu e sedu pobu di renu di Deus. Ningin ka pudi oja renu di Deus si i ka padidu di nobu.

Versikulu di Distaki: Si algin liga ku Kristu, i ta sedu nobu algin. Kusas beju pasa ja; tudu vida bida nobu. (2 Korintius 5:17)



STORIA BIBLIKU - Sumia Simentera

Intruduson tene informason pa judau ntindi storia

Un omi ku comadu Nikodemus bai pa Jesus i fasil un purgunta. Nikodemus seduba un šef riližiosu muitu importanti.

Storia Bibliku kumsa li.

I tenba un omi fariseu ku comadu Nikodemus, ku seduba šef di Judeus. I bai pa Jesus di noti, i falal: “Rabi, anos no sibi kuma Deus mandau pa bu bin nsinanu, pabia ningin ka pudi fasi e sinal ku bu ta fasi si Deus ka sta ku el.” Jesus ruspundil: “N na kontau bardadi kuma, kin ku ka padidu utru bias ka pudi oja renu di Deus.” Nikodemus puntal: “Kuma ku un omi beju ta pudi padidu utru bias? Nta i pudi miti na bariga di si mame pa i torna padidu?” Jesus ruspundil: “N na kontau bardadi, kin ku ka padidu di yagu, tambi di Spiritu di Deus, i ka pudi yentra na redu di Deus. Na kurpu algin ta padidu na si papes; Spiritualmenti i ta padidu na Spiritu di Deus. Ka bu dimira suma ku N falau kuma i pirsis pa bu padidu utru bias. Bentu ta supra nunde ki misti; bu ta obi si baruju, ma bu ka ta sibi nunde ki ta sai nel, nin pa nunde ki na bai. I asin tambi ku tudu jinti ku padidu di Spiritu di Deus.” (Jon 3:1-8)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Jon 18:36; Atus 1:3; Romanus 6:4; 2 Timótiu 4:18; 1 Pedru 1:23; 2 Pedru 1:11)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus konta kuma ningin ka pudi yentra na renu di Deus si i ka padidu di nobu. Jesus fala Nikodemus kuma i dibi di padidu di yagu i di spirititu.

Bardadi Ku Deus Skirbi



Tema di Lison - Purpara Terenu

Biblia i Skritura Sagradu i puderosu. Bardadi ku sta na Biblia pudi muda no korson ku no menti. Biblia i muitu importanti; i un libru ku ta kontanu kin ki Deus. Biblia i uniku libru ku bin di Deus.

Versikulu di Distaki: Tudu Skritura, i Deus ku nspirali; i ten purbitu pa nsina, pa raprindi, pa kuriži, pa mostra manera di yanda diritu, pa omi di Deus pudi sta kompletu, trenadu diritu pa tudu bon tarbaju. (2 Timótiu 3:16-17)



STORIA BIBLIKU - Sumia Simentera

Intruduson tene informason pa judau ntindi storia

Antis di Jesus kumsa Si ministeriu, I tentadu pa Satanas. Ne tentason, Jesus sempri ta ruspundi ku Skritura pa pudi risisti tentason.

Storia Bibliku kumsa li.

Na ki tempu Spiritu di Deus gia Jesus, i lebal pa lala pa diabu pudi tentat. Oca Jesus pasa korenta dia ku korenta noti sin kume, i tene fomi. Tentadur ciga pa el, i falal: "Si kontra abo i fiju di Deus, manda e pedras pa e bida pon." Jesus ruspundil: "I sta skritu kuma i ka son kumida ku ta da omi vida, ma tamba i tudu palabra ku ta sai na boka di Deus." Dipus, diabu lebal na prasa santu, ku sedu Jerusalem, i pul na lugar mas altu na kasa di Deus, i falal: "Si kontra abo i fiju di Deus, jukuta di li pa bas, pabia asin ki skirbidu: `Deus na da si ajus ordi pa e nguentau na se mon, pa ka bu pe maja na nin un pedra.'" Jesus rupundil: "Tamba i sta skritu: `Ka bu tenta Siñor bu Deus.'" Diabu torna lebal mas na un monti altu, i mostral tudu rebus di mundu ku se gloria, i falal: "Na dau es tudu si bu mpina bu adoran." Jesus falal: "Sai li, Satanas pabia i sta skritu: `Bu na adora Siñor bu Deus; i el son ku bu na sirbi.'" Na ki ora diabu disal. Anjus ciga, e sirbil. (Mateus 4:1-11)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Salmus 119; Romanus 10:17; Efesius 6:13-17; 2 Pedru 1:20-21; Tiagu 1:21)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus nfrenta Satanas ku Skritura. No pudi tamba usa Skritura suma un arma kontra ataki di inimigu i suma un nstrumentu pa kirsinti no fe.

Sigiduris di Kristu Dibi Di Vivi na Unidadi



Tema di Lison - Purpara Terenu

Oca Jesus disa tera I riba pa si Pape na seu, I disa Igreža suma Si prepresentanti na tera. Suma sigiduris di Kristu, no dibi di vivi na ermondadi ku utrus sigiduris di Kristu i no nkoraža N utru na fe. Igreža i Kurpu di Kristu; Kristu I kabesa di Igreža.

Versikulu di Distaki: Tambi N na falau kuma abo i Pedru. Riba de pedra N na kumpu ña Igreža. Forsa di nfernu ka na bin pudi ku el. (Mateus 16:18)



STORIA BIBLIKU - Sumia Simentera

Intruduson tene informason pa judau ntindi storia

Dipus di Jesus riba pa Si Pape na seu, Spiritu Santu bin. Numeru di krentis buri maitu rapidu. Krentis kumsa junta pa ngaba Deus i pa studa Skritura juntu. E krentis ta kuidaba di kil mas pobris i ku viuvras tambu. Purmeru Igreža na Jerusalen formadu pa dus grupu diferenti. Un grupu di Igreža ta papiaba Gregu i e ta comadu "Judeus Helenistiku." Kil utru grupu ta papiaba na lingua di Hebreu; e ta comadu Judeus Ebraiku. Saserdotis ne storia e sedu saserdotis ku setaba riližion di Judeus.

Storia Bibliku kumsa li.

Na ki dias, suma ku numeru di krentis na buri, ki Judeus ku ta papia Gregu e na kešaba kontra kilis ku ta papia lingua di Judeus, pabia se viuvras ta diskisidu na ora di rapati kumida, suma ki ta fasidu kada dia. Ki dozi apostolus junta krentis tudu, e fala elis: "I ka bon pa no disa konta palabra di Deus pa no bin sirbi na mesa. Ermons, bo kuji na bo metadi seti omi di fiansa, incidu di Spiritu Santu ku jiresa, pa no ntrega elis e garandi tarbaju. Ma anos no ta pega tesu na orason ku tarbaju di konta palabra." Tudu fika kontenti ku e ideia. E kuji Stevon, omi incidu di fe ku Spiritu Santu, Filipi, Prókoru, Nikanor, Tinon, Parmenas ku Nikolau di Antiokia ku setaba riližion di Judeus. E tisi elis dianti di apostolus. Apostolus pui mon riba delis e ora. Asin palabra di Deus na spajaba kada bias mas. Numeru di krentis na buri ciu na Jerusalen. Manga di saserdoti seta fe di Jesus. (Atus 6:1-7)



PROESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Atus 2:42-47; 1 Korintius 12:12-28; Efesius 2:19-21; Efesius 4:14-16; Hebreus 10:25)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Biblia ta kompara Igreža ku kurpu di pekadur. Kada parti na kurpu di pekadur tene un tarbaju spesial i kada parti ta dipindi di utru partis. Sigiduris di Kristu dibi di sedu fiel na se responsabilidadi, pa e junta ku restu di Igreža.

Lus Di Mundu

Mostra Lus Di Kristu



Tema di Lison - Purpara Terenu

Suma sigiduris di Kristu, no vida dibi di mostra imažen di Kristu. No dibi di mostra mundu kin ki Kristu na no manera di vivi.

Versikulu di Distaki: Asin tambi ku bo dibi di fasi pa bo lus pa i numia dianti di jinti, pa e pudi oja kusas bon ku bo ta fasi, pa e pudi ngaba bo Pape ku sta na seu. (Mateus 5:16)



STORIA BIBLIKU - Sumia Simentera

Intruduson tene informason pa judau ntindi storia

Un garandi multidon di jinti junta na roda di Jesus pa sukuta Si nsinamentu.

Storia Bibliku kumsa li.

"Abos i sortiadu ora ke na koba bos mal, e na pirsigi bos, e na konta mintida kontra bos pabia di mi. Bo kontenti, bo jukuta di alegria, pabia garandi pagamentu na pera bos na seu; asin ku anunsiaduris trataduba antis di bos. Abos i sal di mundu. Si sal pirdi si gustu, ke ku ta pul mas pa i salga? I ka bali pa nada, son pa bota fora pa jinti masal. Abos i lus di mundu. Un prasa ku sta na monti i ka pudi sukundi. Kanderu ka ta sindidu pa i pudu bas di un kašoti, ma riba di un stanti altu, pa i pudi numia kasa diritu pa tudu kilis ku sta la. Asin tambi ku bo dibi di fasi bo lus pa i numia dianti di jintis, pa e pudi oja kusas bon ku bo ta fasi, pa e pudi ngaba bo pape ku sta na seu. (Mateus 5:11-16)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 5-7; 2 Korintius 4:6; 1 Jon 1:7; 1 Jon 2:10)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus nsina Si sigiduris kuma ke pudi vivi un vida di bon imažen i kuma ke pudi vivi un vida ku bon obra.

Pa Sempri ku Deus o Pa Sempri na Sufrimentu



Tema di Lison - Purpara Terenu

Vida ka ta kaba dipus di mortu. No ta kontinua vivi pa sempri. Tudu jinti na pursenta konta pa vida ku e vivi na tera. Sigiduris di Kristu e na vivi pa sempri ku El. Kilis ku ka sigi Kristu e na vivi na sufrimentu pa sempri, lunju di presensa di Deus.

Versikulu di Distaki: Ka bo dimira. I na ciga ora ku tudu mortus ku nteradu na obi si vos; e na sai na koba. Kilis ku fasi ben e na lanta pa vida; kilis ku fasi mal e na lanta pa kondenason. (Jon 5:28-29)



STORIA BIBLIKU - Sumia Simentera

Intruduson tene informason pa judau ntindi storia

Jesus nsina Si sigiduris aserka di iternidadi; i usa storia di un omi riku ku un omi pobri.

Storia Bibliku kumsa li.

"I tenba un omi riku ku ta bisti ropa finu, karu; i ta kume sabi, i ta ronka ben. I tenba tamba un omi koitadi ku comadu Lazaru, ku ta ditandaduba na porton di riku. Cagas kubril kurpu. I ta mistiba kume restu ku ta sopra di mesa di riku. Kacuris propi ta bai limbil si cagas. Un dia ki koitadi muri. Anjus lebal lungu di Abraon. Riku tamba muri, i nteradu. La na lugar di mortus i staba na garandi sufrimentu. I yalsa uju, i oja Lazaru la lunju, juntu ku Abraon. I grita risu, i fala: 'Pape Abraon, ten pena di mi, bu manda Lazaru pa i moja ponta di dedu na yagu, i freskan lingua pabia N na kastiga dimas ne fugu li.'" Abraon falal: 'Fiju, lembra kuma bu risibi tudu ben na bu vida, Lazaru son mal. Gosi el i konsoladu, abo bu sta na kastigu. Fora des, i pudu un kobon garandi, fundu, na metadi di nos ku bos. Nin ku algin di li misti kamba pa bo ladu, i ka ta pudi; tamba ningin di la ka pudi bin pa li.' I fala: 'Ja ki asin, pape, nrogau pa bu mandal na kasa di ña pape, pabia N tene sinku ermon; pa i bai avisa elis pa ka e bin tamba pa e lugar di kastigu.' Abraon falal: 'E tene palabra di Moisés ku di anusiaduris; pa e seta kila.' I fala: 'Nau, ña pape Abraon, ma si un algin ku muri lanta i bai pa elis, e ta ripindi. Abraon falal: 'Si e ka obi palabra di Moisés ku di anusiaduris, nin ku algin ku muri lanta, e ka na fia.'" (Lukas 16:19-31)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 19:16-26; Mateus 25:45-46; Romanus 6:20-23; 1 Tesalonisensis 4:13-18)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Un dia tudu jinti na firma dianti di Deus pa da konta di ke ku e fasi na se vida. Pasa iternidadi juntu ku Deus i ta dipindi di no kumuñon ku Deus.

Jesus Kristu Na Julga Tudu Jinti



Tema di Lison - Purpara Terenu

Jesus bin pa tera pa torna kil kumuñon ku omi teneba ku Deus na kumsada. I na riba mas pa tera utru bias pa pui fin na tudu tarbaju di satanas i pa julga jinti mau. I na kondena kilis ku ka setal suma Siñor. Jesus na paga jinti justu pa se fe.

Versikulu di Distaki: Na ki dia i na ten gritu di ordi, ku vos di arkanju, ku toku di korneta di Deus. Siñor propi i na disi di seu. Kilis ku muri ku fe na Kristu e na lanta purmeru. Dipus, anos ku sta inda bibu, no na rabatadu juntu ku elis na nuven, pa kontra ku Siñor na ar. Asin no ta sta juntu ku Siñor pa sempri. Bo ba ta konsola N utru ku e palabra. (1 Tesalonisensis 4:16-18)



STORIA BIBLIKU - Sumia Simentera

Intruduson tene informason pa judau ntindi storia

Ne storia Jesus na papiaba utru bias aserka di julgamentu ku na bin pa jinti na fin di vida na tera.

Storia Bibliku kumsa li.

Suma ku pape ta lantanda mortus, i da elis vida, asin tambu ku Fiju ta da vida pa kilis ki misti da. Ña Pape ka ta julga ningin, ma i da si Fiju puder pa julga, pa tudu jinti pudi rispita Fiju suma ke rispita si Pape. Kin ku ka rispita Fiju, i ka ta rispita si Pape ku mandal. N na konta bos bardadi, kin ku obi ña palabra, i seta kil ku mandan, i ta tene vida ku ka ta kaba. I ka na kondenadu, ma i pasa ja di mortu pa vida. N na torna konta bos bardadi kuma, ora na bin, i ciga ja, ku mortus na obi vos di Fiju di Deus; kilis ku obil e ta bin tene vida. Suma ku ña Pape i fonti di vida, i da tambu si Fiju puder di sedu fonti di vida. I dal puder di julga jinti pabia i Fiju di omi. Ka bo dimira. I na ciga ora ku tudu mortus ku nteradu na obi si vos; e na sai na koba. Kilis ku fasi ben e na lanta pa vida; kilis ku fasi mal e na lanta pa kondenason. "Ami na ña forsa N ka pudi fasi nada; suma ku N obi, asin ku N ta julga. Ña juisu i justu, pabia N ka misti fasi ña vontadi, ma vontadi di ña Pape ku mandan. (Jon 5:21-30)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Markus 9:41-48; 1 Korintius 3:11-15; 2 Korintius 5:10; Apokalipsi 20:11-15)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Jesus avisanu kuma no dibi di sta pruntu pa ora ki na riba pa julga jinti mau i pa paga kilis ku vivi un vida justu.

SIA DI SIÑOR

LISON
4-12

Importansia Di Lembra Mortu Di Kristu
Pa No Pekadus



Tema di Lison - Purpara Terenu

Jesus nsina Si sigiduris pa e toma parti sempri na sia di Siñor. Es i sinal kuma no lembra di sakrifisiu ku mortu di Jesus, ku paga un presu pa no pekadu.

Versikulu di Distaki: I toma pon, i fala Deus obrigadu, i kebral, i da elis, i fala: “Es i ña kurpu ku dadu pa bos. Bo fasi es pa ña lebransa.” Di mesmu manera, dipus di sia, i toma kopu, i fala: “E kopu i nobu kontratu seladu ku ña sangi ku darmadu pa bos.” (Lukas 22:19-20)



STORIA BIBLIKU - Sumia Simentera

Intruduson tene informason pa judau ntindi storia

Kil noti antis di Jesus muri na krus, I kume ultimu sia ku Si disipulus. I pidi Si disipulus pa e lembra sempri Del ku Si mortu na krus.

Storia Bibliku kumsa li.

Ne kusa ku N na bin fala gosi, N ka pudi ngaba bos, pabia bo juntamentu i ka pa ben, ma i pa mal. Purmeru kusa, N obi kuma, si bo junta pa adora Deus, bo ta dividi grupus. Na un parti N fia kuma i bardadi. (Sertamenti i pirsis pa bo ten purfia na bo metadi, pa pudi kunsidu kilis ku sta na bardadi.) E ku manda, si bo junta na un lugar, i ka Sia di Siñor ku bo na kume, pabia, ora ku bo na kume, kada un ta jumna N utru pa kume di sil; utru ta fika ku fomi, utru ta cami. Nta bo ka tene bo kasas pa kume, pa bibi nel? O bo ta njuti igreža di Deus pa pui na borgoña kilis ku ka tene nada? Ke ku N pudi fala bos? Pa N ngaba bos? Nes li N ka pudi ngaba bos. Pabia N risibi di Siñor ki nsinamentu ku N pasanta pa bos, kuma Siñor Jesus, na noti ku Judas falsial, i toma pon, i fala Deus obridadu, i kebral, i fala: “Es i ña kurpu ki pa bos. Bo fasi asin pa ña lebransa.” Na ki mesmu manera, dipus di sia, i toma kopu, i fala: “E kopu i nobu kontratu seladu ku ña sangi. Kada bias ku bo bibi nel, bo ta fasil pa lembra di mi.” Kada bias ku bo kume e pon, bo bibi ne kopu, bo ta konta mortu di Siñor te ki bin. (1 Korintius 11:17-26)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Lukas 22:7-38; Jon 6:47-58; 1 Korintius 11:17-34; Apokalipsi 19:9)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Si no na toma Sia di Siñor no ta mostra rispitu pa Jesus; i un tempu ku no ta pudi jubi no vida diritu, si no sta na kumuñon ku Deus. I tempu nunde ku sigiduris di Kristu dibi di ngaba Siñor ku da Si vida pa nos.

Fasi Un Diklarason Publiku di Fe na Kristu



Tema di Lison - Purpara Terenu

Batismu na yagu i muiitu importanti na vida di un nobu krenti. Batismu i mumentu ku un nobu krenti ta diklara si fe na Kristu na metadi di jinti ora ki mburgujantadu na yagu, ku signifika muri pa mundu o pa ki antigu manera di vivi. Ora ku i tiradu na yagu, i ta signifika nobu vida na Kristu.

Versikulu di Distaki: Pedru fala elis: "Bo ripindi, kada un di bos, bo batisadu na nomi di Jesus Kristu, pa bo pekadu pudi purdadu. Asin bo ta risibi Spiritu Santu ku Deus na da bos. (Atus 2:38)



STORIA BIBLIKU - Sumia Simentera

Intruduson tene informason pa judau ntindi storia

Jesus teneba un primu comadu Jon Batista. Jon Batista ta batisaba jinti na yagu suma un sinal di aripindimentu di se pekadu. Jesus nunka I ka fasi pekadu, ma I sinti kuma i bon pa i pasa pa batisumu pa I pudi mostra jinti importansia di batisumu.

Storia Bibliku kumsa li.

Jesus bin sai di Galileia, i bai pa riu Jordon pa Jon pudi batisal. Jon ka muiitu misti, i falal: "Abo ku dibi di batisan; bu na bin gora pa N batisau?" Jesus ruspundi i falal: "Disa kila, pabia de manera no ta fasi kil ku Deus misti." Asin Jon seta. Oca Jesus batisadu, i sai na yagu. Na ki ora seu yabridu; i oja Spiritu di Deus na ria riba del suma punba. Um vos di seu fala: "Es i ña fiju ku N kiri ciu. N ten garandi kontentamentu nel." (Mateus 3:13-17)



PROSESU DI DISKUBERTA - Regua bu Pui Strumu



STUDU ADISIONAL DI SKRITURA - Korta

(Mateus 28:16-20; Atus 8:26-40; Romanus 6:3-13; Kolosensis 2:9-12)



PURGUNTAS DI APLIKASON - Kebra Fruta (2 Timótiu 3:16-17)

KONKLUSON

Nobu Testamentu ta nsinanu kuma batisumu na yagu i importanti na vida di krentis. Batismu na yagu signifika muri pa mundu, o muri pa vida beju i lanta pa un vida nobu na Jesus.

E livru dadu nome di:

Bo Padi Ciu Bo Multiplika

Na kumsada no oja kuma Deus kumpu tudu kusa pa e pudi “padi” pa e “multiplika.” Biblia diklara kuma tudu kusa kumpudu pa e padi “suma se koldadi.” Oca ku Deus kumpu omi, kil mesmu ideia di padi ku di multiplika ka muda. Deus bensua elis, i fala elis: “Bo padi ciu, bo inci mundu, bo manda riba del. (Kumsada 1:27-28)

Deus kumpunu l “bensuanu” pa no padi ciu no inci tera. Mas di 6,000 anu omi kumpri e mandamentu, e inci tera.

Oca Jesus Kristu staba inda na tera, l nsina kuma no dibi di spurmenta padidu utru bias o padidu spiritualmenti. Na bardadi, Jesus nsina kuma ningin ka na yentra na renu di Deus si i ka padidu utru bias. Jesus ruspundil: “N na kontau bardadi, kin ku ka padidu di yagu, tambi di Spiritu di Deus, i ka pudi yentra na renu di Deus. Na kurpu algin ta padidu na si papes; spiritualmenti i ta padidu na Spiritu di Deus.” (Jon 3:5-6)

Kristu comanu pa un vida nobu. E vida nobu i ta padidu di Spiritu Santu. No ta diklara nobu nasimentu ora ku no batisadu na yagu. Mandamentu di Deus aserka di padi ciu pa multiplika i ta mostradu ora ku no padidu di Spiritu. Na no vida nobu na Kristu, no ta dadu ordi i no ta dadu tambi manera di disinvolti no nobu vida spiritual. Jesus ciga pertu, i fala elis: “N dadu tudu puder na seu ku na tera. Asin, bo bai pa jinti di tudu nasons, bo fasi elis ña disipulus. Bo batisa elis na nomi di Pape, di Fiju ku di Spiritu Santu. Bo nsina elis pa e obdisi tudu kusas ku N manda bos. Ami N na sta ku bos tudu dia te na kabantada di tempu.” (Mateus 28:18-20)

Kristu comanu pa fasi disipulus i pa batisa elis, asin pa e pudi yentra na renu di Deus. No comadu pa un nobu nasimentu i pa no vivi un vida ku ta padi Frutu spiritual.

Es Libru di Bo Padi Ciu Bô Multiplika i fasidu pa pudi nsina sigiduris di Kristu, pa leba elis pa e tene un vida ku ta padi Frutu spiritual, asin, pa e pudi multiplika spiritualmenti. Palabra di Deus ku tene vida, ku ta fika pa sempri, el ku pui pa bo padidu utru bias; bo ka padidu na pape ku ta muri, ma na pape ku ka ta muri. (1 Pedru 1:23)

Pa Siñor bensuaui ciu ku manga di Fruta i ku kirsimentu na bu nobu vida spiritual ku bu ministeriu tambi. Pa no oja e tera inci di kilis ku padidu di nobu pa renu di Deus!

Kontaktu di Skritoriu Lokal
di Kada Kasa Pa Kristu:

(00245) 661 88 66 / 551 88 66

jjdasilva109@hotmail.com / ccc 2011@hotmail.com

KaiŠa Postal: 1046-Bissau, Republika di Guine-Bissau

I fasidu pa
Kada Kasa Pa Kristu juntu ku:



Every Home for Christ International
P.O. Box 64000, Colorado Springs, CO 80962-4000
www.iBFAM.org
Version 4.0